

# Nyumà Miseeswishi



Bèèt wǎbu mu dinda emu, balunda bàànyì. Ndi ne disanka dya kwikala kaaba aka mu dinda emu, ne mwikàle mumanye ne pândì nnumona bônso apa, ngiitabuuja ne Mukalenge ùdi neetu leelu ewu, ùtùpèèsha ndambu wa mundidimbi, bwa kakwikadi luuya lupite búngì mu tabernacle emu bwa mudimu wà mu dinda emu to. Nenku mpindyewu tudi. . .

<sup>2</sup> Ngeela meeji, kùdi bàna. . . Bàkaadi batùme bàna mu tulaasa twabo anyì, Mwaneetu Neville? Ngámònu ndambu wa bàna bakese, nenku mvwa anu ndikonka ní bàkaavwa batangàlaje tulaasa babàlùje mu myaba yabo—yabo mikwabo, mu cibambalu cyabo cya kalaasa kàà Dyalumingu.

<sup>3</sup> Mpindyewu, nwànsambidilaayikù. Ndi ne dipàngadika dinene dímvwà ne cya kwangata makeelela diloolo awu, kadi bidi bikèngela ndyàngatè leelu ewu. Nenku ekeleeziya àsambilèku. Ndi ne—ndi ne disangisha dilwalwà kumpala eku, didi menemene anu mu njila wa Rideau de Fer mu Allemagne, pa nanku bwalu bùdi bwa bütàcishangana ndambu. Nenku nwànsambidilaayikù. Ne pa nanku, bidi, tudi mwa kubangila dyakamwe mu cipalu cinènè cya ndundu wa mipànji cya mu Allemagne, cìvwà Hitler mwibakische kumpala kwa mvita aci, mwaba munene mulenga wà dikema, ne myaba ya disomba binunu makumi mwandamukulu. Nenku tudi mwa kucyangata bwa maloolo dikumi, malondangane. Ne pa nanku tudi tutekemena ne netubangile dyakamwe mwômò amu, ne pashiishe netuye ku La Salle Lorraine, mu France, pashiishe, pashiishe mu Berlin, kwalukila. . . Ndi muswe kwamba ne, Berlin pankaci pàà mwômò amu ne—ne France.

<sup>4</sup> Pashiishe netwalukile, bu Mukalenge mwa kwanyisha, mu mpungilu kampanda mu Chicago. Cìdi cibanga, ngeela meeji, mu matuku a ngondo ataanu, asambombo, mwandamutekete, mwandamukulu, ne citeema, ki cyànyì cikongònyì ncyòci aci mu Chicago, cya mu mpungilu awu ku ekeleeziya wa—wa Suède. Ne pashiishe bôbò abu, Mukalenge Boze, bamwe bàà kunùdi bàà pabwipi ne Chicago, bàdi ne mpungilu uvwa ne cya kwenzeka mu. . . uvwa ne cya kubanga mu dituku dimwe dya ngondo wa mwandamukulu, anyì mmu dituku dimwe dya ngondo wa citeema dilwalwà edi, ki mudiye, mu Suède. Ne ndi ne disanka dyàbúngì be dya kumanya mùdìbo beelè tukanda bansungule mèmè, bwa mèmè kukùya, ne disungula adi diikàle dya bantu bônso ne dya lukama pa lukama. Mvwa musanke bwa bwalu abu, kadi bidi bikèngela anyì bwa mèmè kuya kwòkò aku anyì apa nanku mpindyewu. Nùsambilàayikù bwa Mukalenge wàndombola anu ku mwaba menemene wikalà misuuka yàbúngì

ne cya kusungidiibwa, ne kwikalà cìdì citàmbe bwîmpè ne cya kwenjiibwa bwa Bukalenge bwa Nzambi aku. Mpindyewu, bàdi munkaci mwa kwenza mpungilu kuntwaku, ne—ne bôbò mu Suède, ne yêyè mmwambe ne netwikalè ne bantu binunu makumi abidi ne bitaanu, anyi makumi asatu ne bitaanu anu patùcìdì tubangilaku apu, ku mpungilu awu, ne bààbûngì bàà kùdìbo mbantu bàdi kabàyi basûngìdìibwe to.

<sup>5</sup> Nenukushi mu Allemagne emu, ee, bàdi ne cipalu cya ndundu cya myaba ya disòmba binunu makumi mwandamukulu. Mu bushuwa bwa bwalu, twètù, mu Suisse mutùdi tufuma ku dyumuka emu, tudi benzemu disangisha dilenga dya dikema, didi pàmwàpa bààbûngì bàà kunùdi kabàyìkù banjì kuumvwa bàmba to. Mukalenge mmutubeneshe èyo, bapetè bantu bakùdimùne mucima kì mbàngì kì mbàngì binunu makumi ataanu bya Kabamba mu maloolo ataanu, mu—mu—mu Zurich, mu Suisse.

<sup>6</sup> Nenukushi, Mwaneetu Jack Shuler, bààbûngì bàà kunùdi mbamumanye, yêyè m'Méthodiste, mwanà wa mukulampe Bob Shuler. Bàdi basanganyibwa mu Belfast patùdi twakulangana apa, ne—ne bàdi bàmba ne ki kujuulabo kàyumbayumba eku, kuntwaku, bwa Evanjeeliyo, ne bitàmbe mene ne bìvwà Billy Graham mwenze mu dyèndè disangisha. Jack nnsongàalùmè wa maalu malenga wa dikema, mùle tente ne lukunukunu ne dinanga. Ne yêyè—yêyè ùdi anu ne meeji matooke mu bwalu abu mu mushindu wà ne mèmè ndi ngiitabuja ne yêyè mmusadidi munene wa Mukalenge. Nenukushi nwèndè nùsambidilàayìkù Mwaneetu Shuler awu. Ne—ne Jack Shuler, ne Jack MacArthur kabidi ùdi nende. Mwaneetu Jack MacArthur ùtu kabidi muyiishi munene. Ne kùdi beena mu maekeleziya mbambè ne nditabuluja ditàmbe bunene ditù kacya kadiyìkù dyanjì kulenga Irlande to. Pa nanku tudi . . . Nùbwelàayi mu masambila ku dituku ne ku dituku bwa balume abu—abu. Bònsò babidi nnsongàalùmè ya bidimu mwinshi mwa, ya bidimu bìpacila ku makumi anaayi, ngeela meeji, anyi bishààdile, ne mèkù ne bikwabo byònsò, ne balongeshi balenga bashìndàme bàà Evanjeeliyo, ne twètù tudi babànangè.

<sup>7</sup> Nenukushi mpindyewu, ndi—ndi nsambila bwa kanwikadi nwâlwa kumpwa mwoyi to, bwa—bwa Nzambi wènzakù bwa mèmè kwangata dipàngadika dijaalàme mpindyewu mene. Kùtu misangu yùdi kùyìkù umanya ne kwa kukudimukila nkwepì to. Nukààdikù basanganyìibwe mu myaba ya mushindu awu anyi? Ngeela meeji ne Pòlò ngwàkasanganyìibwa mu mwaba wà nanku awu musangu kampanda, kì mmwòmò anyi? Wàkashààla mukolo mule ne mwìpì. Kadi pàvwàye wènda ùya kuntwaku apu, mona's, kumonaye mwanjelo mu cikeena-kumona ùmwambila ne: "Lwà ku Màkèdooniya." Pa nanku Mukalenge ùcìdi anu ne Mwanjelo Wèndè awu, kì mmwòmò anyi? Mèmè ewu ngikalapù

anu mudipwekeshe mu mwoyi wànyì pa bwalu abu mùvwà Pôlò amu's wè.

<sup>8</sup> Nenku mpindyewu, diloolo edi, nwavulukaayi masangisha a Evanjeeliyo ku tabernacle eku, nùlwayi bônso. Nwènu bàdi pabwipi ne Louisville abu, nèngikalè ne cya kwakula ku Ekeleeziya wa Ciibi Cyunzulula, diloolo edi, munda mwa mèbà abidi, pa dîbà mwandamutekete ne tusunsa makumi asatu too ne pa dîbà citeema ne tusunsa makumi asatu, kwa Mwaneetu Cauble. Mvwa muswe kulwa misangu yibidi kaaba aka. Kadi yèyè mmuntu wa maalu mîmpè wa dikema, ne mmumbiikile ku telefone. Ne yèyè Mwaneetu Cauble awu, mmuntu mukalanga wa maalu mîmpè, mwaneetu. Nwènu, ndi mutwishiibwe ne nudi bamumanye, yèyè mmwaneetu wa maalu mîmpè wa dikema, ne ncivwa anu mwa kumubengela mushindu awu to. Nùsambilàayi. Kumutu kwa byônso, nùsambilàayi, ne nùsambilàayi bwa Nzambi wàtùpèeshakù di—dipàngadika dijaalàmè dya kwangata.

<sup>9</sup> Mpindyewu, kumpala kwa twètù kubanga Diiyiisha dya Evanjeeliyo, tudi ne dinda didi dikèngela kulambula bânà bakese. Ne mèmè pàànyì, ndi ne mwânà mukese kaaba aka wa kulambula, kùdi Mukalenge. Mpindyewu, misangu yàbùngì mu ekeleeziya yàbùngì. . .

Nudi nuumvwa bîmpè anyi, mundekeelu mwàmwa? Panwikalà mwa kuumvwa, mbîmpè anyi? Màkàpàkapà aa, ndi anu, kwèna mwa kuumvwa paùdi wèwè mwine wakula to. To, wòwò awu, àlekèlè. Ndi ncina ne nkwepi kúngaàlwà kufwa mème ncìyi naawu.

<sup>10</sup> Pa nanku, bà—bânà bakese, mîngà misangu batu bàbàmyamina mâyi, mu ekeleeziya, pàcidibo bânà bakese menemene bàà mu maboko apu. Nenku, mu bushuwa bwa bwalu, aci ncifumine ku ekeleeziya wa Katolike, pa kuvwija kwa bânà bakese ne mbeena Kilisto, anyi “difila dya bàatismò” mùdìbo bôbò bàcibiikila pàcidibo anu bânà bakese menemene apu. Ekeleeziya wa ba-Méthodistes kupatukaye naaci, diine dibatiiza dya bânà bakese adi, ne bààbùngì, ne ngeela meeji bakwabo bùngì bu yàmba ne katùkù. Ngeela meeji ne ki dishiilangana didi pankaci pàà ba-Nazaréens ne ba-Méthodistes bàà cyena-kale, divwa ncine cya dibatiiza dya bânà bakese aci, ne pashiishe tusumbusumbu twa tukesetukese tùdi twabùlùkàngane ne bikwabo byônso. Kadi, nansha ciikàle cya mushindu kaayi, kacyènakù, mèmè ncyèna ngeelakù meeji ne cìdi ne bwalu menemene to. Bwalu, byôbi biine, ndi ngeela meeji ne Kalvariyo kààkacileea patooke, anu mwaba awu, bwa byônso abi, ncya bushuwa, bwalu Yesu wàkafwà kwòkù aku bwa kusungila bânà bakese ne kusungila bàà pa buloba.

<sup>11</sup> Nenku mwânà mukese, nansha mwikàle ne muledi wa mushindu kaayi, nansha mubiipe wa bishi, aci kî ncifwànyìnekù

kushintulula cintu to, bwalu Mashi a Yesu Kilisto àdi àmukezula, nwamonu's, ne ewu m'Mwânà wa mukooko wà Nzambi udi umusha mpekaatu ya bàà pa buloba. Mwânà wa mu diboko awu kèna mwa kunyingalala to. Yèyè kî mmumanye mwa kunyingalala to. Kèna ne kabingilà kàà mùdiye ùsanganyibwa panwapa to, kèndè yèyè mwine. Kèna mwa kukwambila ne mbwà cinyi ùdi ùsanganyibwa panwapa to. Kadi Nzambi ngudi mumutume panwapa, ne Mashi a Yesu Kilisto àdi àmukezula pa dîbà mene didiye anu ne wàfikî pa buloba. Nenukù bîdi ne ntoo ne pàdiye ùfika pa cipimu cya didyambwila dya bujitu, dîbà adi ùdi ùmanya maalu mîmpè ne maalu mabi, ne dîbà adi cidîye wènza yèyè ùdi ne cya kunyingalala bwa cidîye mumanye ne mmwenze bibî aci. Ncya bushuwa. Pa nanku, bamwe bàà kùdîbo bàtu bàbàmyamina mâyi, ne bèèla meeji ne kabeena bàya mu Dyulu to.

<sup>12</sup> Ne kùdi dilongesha dîdi dyàmba ne mwânà yèyè mulediibwe kùdi baledi biikàle ne Nyuma Mwîmpè, ee, awu mwânà kaayi ùyaaya mu Dyulu; kadi, kabîyi nanku to, awu bwèndè mbujikè, awu mwânà kàcyènakù kabidi to. Adi's ki dipanga anu dyetu dya menemene edi. Ndishiilangana kaayi didîku nansha yèyè mulediibwe kùdi baledi bùle tente ne Nyuma Mwîmpè? Byônso's ndijinga dya disangila dya mulume ne mukaji, ne mwânà awu ùdi ùlediibwa anu mu mushindu wumwewumwe awu. Pa nanku, yônso "mmulela mu mpekaatu, mufwimba mu bubi, mulwe pa buloba mwikàle wàmba mashimi." Ayi, ayi's ki myaku ya mu Mifundu bwa cyôci aci.

<sup>13</sup> Pa nanku, ne dîbà adi Mashi a Yesu Kilisto's àdi àkezula ne ènza difuta dya cibawu bwa mwânà awu. Yèyè mufwe, mmufwànyine anu kuya buludi mu Bwikadi bwa Nzambi mu bupwàngàne bwônso, nansha yèyè mulediibwe kùdi baledi bàà batàmbe kubiipa bàà pa buloba, too ne pàdiye ùfika pa cipimu cya didyambwila dya bujitu pàdiye ùmanya maalu mîmpè ne maalu mabi. Nenukù dîbà adi cidîye wènza aci, kubangila dîbà adi, bîdi bikèngela bwa àfwidiibwè luse bwa cyôci aci. Bikèngela bwa àdilòmbèlè yèyè mwine kanyinganyinga kubangila apu. Kadi bwa pàcidîye mwânà wa mu diboko . . .

<sup>14</sup> Mpindyewu, mushindu wutùdi tuteeta kulonda, mu tabernacle emu. Mwaba wumwepele pa buloba wûnyaayà, wûndi nyiisha Dilongesha dya nshindameenu, mmu tabernacle emu, bwalu ewu ng'ekeleeziya wetù twètù. Ne twètù tudi tuyiisha Dilongesha dya nshindameenu kaaba aka bwa kulama bantu mu njila. Bantu bakwabo, mu yabo ekeleeziya, bàdi bàyiisha cyônso cidîbo biitabuuja aci. Kadi mbânà beetu, ne tudi bafwànyine kupangakana kakese, kadi nansha nanku tudi anu bânà bàà muntu. Nenukù, kadi mu tabernacle emu, tudi tuyiisha citùdi twètù twela meeji ne ki Dilongesha dya mu Mifundu aci. Nenukù, mwômò amu, tudi tumona bwa dilambula dya bânà, citùdi tubiikila ne ndilambula aci,

musangu wumwepele wutùdiku mwa kucisangana mu Bible, anyi mu Dipungila Dipyadipya mwaba wùvwà bânà bakese biikàleku ne cintu kampana cya dyenza, anyi Kilisto mwikàle ne cintu kampana cya dyenzamù bu mushingà, pàvwa, mpàakabàmbulàYe mu maboko Èndè ne kubatentekelaYe byanza ne kubabeneshaYe, e kwambaYe ne: “Lekelaayi bânà bakese bâlwe kùNdi. Kanubakandiki to, bwalu mùdi bôbò aba emu ki mùdi Bukalenge bwa Nzambi.”

<sup>15</sup> Mpindyewu, tudi bashààle, bwa mutùdi tuumvwa, bwa kutungunuka ne mudimu wùvwàYe mulwe bwa—bwa kukumbaja awu. Lufu Lwèndè ku Kalvariyo, Yèyè ùvwa neetu kadi kuumukaYe. . . mupatuke mu Nzambi, mulwe pa buloba, mwalukile ùmukila mu Nzambi, anyi muumùke pa buloba muye mu Nzambi, ne mulwe cyakabidi mu mmwenekelu wa Nyuma Mwimpè, ne mwikàle neetu, munda mwetu, too ne kundekeelu kwa buloba, ùtùngunukila mu Ekeleeziya Wendè ne mudimu wumwewumwe wàkenzàYe pàvwàYe pa buloba apa awu. Nenku, ku cyòci aci, tudi twangata bânà batùdi balelè tuya naabo muntu kùdi mukwèndè, kùdi bambi, ne bàbàsambidila, bàbàtentekela byanza ne bàbàlambula kùdi Nzambi. Anu kaamushingà kakese cyanàànà bwa kwamba ne tudi twanyisha cìdi Mukalenge mutwènzèle twètù ne bânà bakese aci.

<sup>16</sup> Mpindyewu, ní bàvwa bamyamìne mwaneebe mukese awu màyi, anyi mushindu wònsò wùtùbi mu ekeleeziya wenù awu, elààku meeji. Twètù katwena twamba kantu nansha kamwe bwa kucilwisha to. Bidi anu bimpè. Kadi, bilondèshile Mifundu, tudi tusangana mwaba anu wumwepele, ngùdi Yesu mubabeneshe, Yèyè mwine. Ki wùngààbalà, bu Mukalenge mwa kwanyisha, mu—mu Diyì emu. Tudi tusangana, mu Luukà Munsantu. . . ngeela meeji ne—ne nnshapita wa 10, ne tubangila ku mvensa wa 13.

*Nenku bààkalwa ne bânà batekete kùdiye, bwa kubalengaye cyanza, kadi bayiidi bèndè bààkatàndisha aba bààkalwà naabo abu.*

*Kadi pààkamònà Yesu cyòci aci, cyàkamubùipila bikole, ne wàkabàmbila ne: Lekelaayi bânà bakese bâlwe kùndi, ne kanubakandiki nansha, bwalu bukalenge bwa Nzambi mbwà aba bàdi mùdi bôbò aba.*

*Bulelela mèmè ndi nzwambila ne: Ewu yònsò wabènga kwakidila bukalenge bwa Nzambi bu mwànà mukese, yèyè kààkumùbwelakù nansha.*

*Nenku wàkabàmbula mu maboko èndè, ne wàkabàtentekela byanza, ne wàkabàbènesha.*

<sup>17</sup> Abi kí mbilenga anyi? Yèyè wàkamba ne: “Mpindyewu, lekelaayi bânà bakese bâlwe kùNdi. Kanùbakàndiki nansha, bwalu bàà bu bôbò aba, bàdi bafwànàngàne ne mwànà mukese

awu abu, bwabo bobo ki mùdì Bukalenge bwa Nzambi.” Nenku Wàkabàmbula mu maboko Èndè, ne Wàkabàbènesha.

<sup>18</sup> Mpindyewu, mushindu mwine wutùdì bafwànyine kunanga, mu dinda emu, bu twètù mwa kwikalaku ne Yesu, Yèye mwine, musòmbe pa cibumba cya ku cyambilu apa, kwamba ne: “Mukalenge, Udikù mwa kuswa bwa kubenesha mwanàanyi ewu anyi?” Kaa, ndyèsè kaayi. . . bwa ètù mèsù a buntu ne myoyi yetu ya buntu eyi yijinga kumonakù aci’s wè. Kadi Yèye’s ùdi kaaba aka, nansha bishi, bwalu Yèyè mmutùtùme ne mudimu bwa kucyènza. Nenku, anu mutwènji amu, ki mùdìYe ùciitaba. Patùdì twakidila aba bàdìYe mutume, tudì tuMwakidila Yèyè ùdi mumutume awu, nudi numona’s. Pa nanku, Yèyè ùdi kaaba aka mu dinda emu. Nenku bu Mwaneeetu wa bakaji Gertie mwa kulwakù ku pyànò ne kwimba musambu wètù wà kale wutùvwàku twimba kùkaadi ntanta mule awu, wà ne: “Bwelàayi naabo muneemu, lwâyi ne bânà bakese kùdì Yesu” awu. Ngeela meeji ne musambu awu wùdì mu mukanda mwàmwa mwaba kampanda. Ncyèna mutwishiibwe to. “Lwâyi ne bânà bakese kùdì Yesu.” Nenku wèwè ne mwânà wa mu diboko, mwânà mukese wa mu diboko udibò kabâyi banji kulambula, ne ujinga kumulambula mu dinda emu, mona’s, netwikalè ne disanka dya kucyènza.

<sup>19</sup> Nenku kùdikù bambi mu citanda emu, bayiishi bàdiku bafwànyine kuswa bwa kulwa kwimanakù neetu kaaba aka patùdì tulambula bânà aba kùdì Mukalenge apa anyi? Netwikalè ne disanka dya kwikalaku neenu, panùdì nulwa apu. Eyo, wùdì mu mukanda amu anyi? Wawùpeci anyi, Mwaneeetu Neville? Kawènamù to. Eyo, mbanganyi bàdì bawùmanyè: *Bwelàayi Naabò Mùneemu?* Eyo, tùwimbààyaaku mpindyewu. Bònsò cyapamwe, pàcidi baamàmù bàlwa ne bânà bààbò bàà mu maboko apa. Eyo. Eyo.

. . .naabo muneemu, bwelàayi naabo muneemu,  
 Bwelàayi naabo muneemu nubùùmusha mu myaba ya mpekaatu;  
 Bwelaayi naabo muneemu, bwelaayi naabo muneemu,  
 Lwâyi ne balalakanyi abu kùdì Yesu.  
 Bwelaayi naabo muneemu, bwelaayi naabo muneemu,  
 Bwelàayi naabo muneemu nubùùmusha mu myaba ya mpekaatu;  
 Bwelaayi naabo muneemu, bwelaayi naabo muneemu,  
 Lwâyi ne bânà bakese kudi Yesu.

<sup>20</sup> Twìnyikàayikù mitu yetu bwa katanci. Taatù wetù wa mu Dyulu, mu nyungulukilu wa cyoshelu mu dinda emu

mmwimàne baamaamù ne baataatù bambùle bânà bààbò bakese mu maboko, baùdi Wèwè mubapèèshe ku ngàsà. Bàdi ne kusakidila kwàbûngì be bwa bôbò abu, Mukalenge, ne nyewu bàlwa naabo ku cyoshelu eku mu dinda emu, mu nzubu wa Nzambi, bwa kubalambula, kufila nsòmbelu yabo Kùdi. Wèwè ngudi mufile. Nenku nyewu tulòmba, Nzambi, bwa Wèwè kudiisha ne kubenesha yònsò wa kùdìbò. Ùbàlombòlèku, ne swaku bwa Banjelo balami bàà Nzambi bàtabaleelè umwe ne umwe. Bàpèèshèku matuku a mwoyi àbûngì a dyèsè ne disanka. Swaku bwa bàkolè bwa kulwabo balume ne bakaji bàà Nzambi, bàà màlàba, pìikalàbi ne màlàba ùdikù.

<sup>21</sup> Nzambi, tudi tulomba bwa Wàjuulakù bayiishi ne baprofeta ne balongeshi mu kasumbu kàà bânà bàà mu maboko bàdi ku cyoshelu eku mu dinda emu aba. Ne patwikalà tukàadi bakulakaji ne katùciyi mwa kutungunuka, bikèngela bwa muntu àtwèndèshè ùya neetu ku kaaba ne ku kaaba, swaku bwa twàpetakù mwa kwimana ne kuteeleja Evanjeeliyo wàyiishabò kùdi bôbò bàdi apa leelu ewu aba. Enzaku nanku, Mukalenge. Ne dîngà dituku dya butumbi pìikalà byònsò bikaadi bijikè, myoyi yetu mijikè, baledi bàdi banyùngùlùkile cyoshelu aba, swaku bwa twìkalakù bu Yakobo wa kale awu pàakabèneshàye bânà bèndè bònsò ne kubambilaye cìvwà ndekeelu wabò mwa kwikala mu dituku dya ndekeelu. Pashiishe pàakatàngilàye muulu, wàkamba ne: “Nudi bamanyè’s, bikèngela nsangishiibwe pamwe ne bàà kwetu.” Ne dîngà dituku dya butumbi, yèyè ne ndelàngànyì yèndè yònsò, nebikengelè bwa kusangishiibwabo mu buloba butàmbe bwìmpè. Kabyena bikèmesha to pàakamba Baalàmà ne: “Ndekeelu wanyì ikalèku bu wèndè yèyè.” Nzambi, ndi ndomba bwa Ùfilèkù mabenesha aa pa baledi.

<sup>22</sup> Nenku mpindyewu patùkaadi tuya bwa kubatentekela byanza apa, ncintu kaayi—kaayi bulengaci. . . Ne mushindu mwine w’Ùdi mucyènzè ne kudipwekesha kwònsò’s, Mukalenge, bwa twètù bantu bàà pa buloba ebu twikalèku ne dyèsè dya kubenesha bânà bakese mu Dîna Dyebe, bamanyè bwalu ebu, ne, citùdi tulomba, bàdi bàtùpèèshaci. Patùkaadi tuya bwa kubabenesha apa, swaku bwa Yesu, Ewu udi kàyi umwenekaku, wa Bukole bwònsò awu imanèku pabwìpi ne àbeneshèku mwànà yònsò patwikalà tubàtentekela byanza ne tubàlambula kùdiYe apu. Bwalu tudi tulomba nunku mu Dîna Dyèndè. Amen.

<sup>23</sup> Mwaneetu Glenn Funk, yèyè ùdi ne bânà bèndè bakese basatu bàà dilambula kùdi Mukalenge.

[Katùpà kàà mukaba wà mèyi munda mutupu. Mwaneetu Branham ùdi ùlàmbula bânà bàà mu maboko—Muf.]

. . .ka—kazùbù kakese kàà cisokomenu, lwà ku nord wa ditunga kwàka, Wèwè ngwàkandaya mwànà ewu. Taatù, swaku bwa mabenesha Èbè ikalà pambidi pèndè.

Joseph, mwanàànyì, ndi nkufila kùdi Nzambi. Ne nsòmbelu webè ikalè dibenesha. Wèwè wikalè muprofeta, Joseph. Ngàsà wa Nzambi ikalè pambidi peebe. Nzambi wa tatwèbè, Mukalenge Yesu Kilisto, àkubènèshè dībà dyònsò, àvwijèku nsòmbelu webè dibenesha kùdi bakwabo.

Mu Dìna dya Yesu Kilisto, ndi mmubenesha. Amen.

[Katùpà kàà mukaba wà mèyì munda mutupu. Mwaneetu Branham ùdi ùlàmbula bânà bàà mu maboko—Muf.]

<sup>24</sup> Nutukù banangè bânà bakese anyi? Cintu kampanda cya kùdi bânà bakese cidì cyènza ne maamù yònsò àswèkù bwa mwanèndè àbeneshiibwè.

Mpindyewu, mushindu awu ngùdi Taatù wetù wa mu Dyulu kutùdi twètù bakulumpe aba mu dinda emu. Yèye mmuswe bwa yònsò wa kutùdi àbeneshiibwè. Ùdi ùtùleeja cintu kampanda, mwikàle anu ùcifila kutùdi bu udi wamba ne: “Kwàta, Ndi muswe bwa ùbeneshiibwè, wèwè mwan’Àànyì.” Yèye kí mmulenga anyi? Pa nanku’s tudi mwa kwanyisha Taatù wa mu Dyulu mwîmpè mushindu awu.

<sup>25</sup> Mpindyewu, mu mabenesha a bânà bakese bàà mu maboko, nudi bamanyè’s, mvwa mbala kaaba aka mene mu Mifundu dituku adi, mwaba kampanda muntwemu, cìvwa mmu Dipungila Dikulukulu, ne, cintu cinènè cìmvwà bushuwa mèmè—mèmè mwanýishe bwa kudifila ku dibala. S’ki cyòci eci, apa mene. “Nenku Natànàèlè wàkambila Davidi ne: ‘Enza cyònsò cidì mu mwoyi wèbè, bwalu Nzambi ùdi neebe.’” Nwamonu anyi? Enza cidì mu mwoyi wèbè. Ne misangu yàbùngì ntu—ntu musangane nunku ewu, mulunda wanyì mwena Kilisto, ne nkààdikù mwambàmbe bintu nciyi mumanye cìmvwà nswa kwamba to, kadi nsangana ne mbyenzeke. Cyùdi wèwè wamba aci!

<sup>26</sup> Byàkambiibwa musangu kampanda ne, Yesu ùvwa ùtuuluka ku mukuna ne kumonaYe mucì kampanda wùvwà kawùyi mukwàmekù cintu to, anu mabeji pa ôwò, kadi kakùyi bimuma to, ki kwambaYe ne: “Muntu kàdikù cyebe cimuma to kubangila ku lelu.”

<sup>27</sup> Ki pàakacyàbu, pàkaavwàbo bàpicila mwaba awu, bapostolo kumonabo mabeji awu mafùbidile. Yèye kwamba ne: “Mona mùdi mucì ewu mufùbidile ne lukasa lwònsò.”

<sup>28</sup> Yesu kwambaYe ne: “Ikàlaayi ne diitabuuja kùdi Nzambi; bwalu cintu cyònsò cinùkààjingì, panùdi nusambila, itàbùùjaayi ne nudi nucipeta ne nenucipete. Ne bintu byònsò binùdi nwamba, nenupete binùdi nwamba abi.” Anji elààyibi meeji ku bwalu abu. Kaa! Ne pàmwàpa lelu, Nyuma Mwîmpè munene wa Nzambi awu, mwimane ku cyoshelu eku, wèwè wamba. . . Ee, kabyena bikèngela bwa kwikalaci cilengeja ne bilòngò to. Kabyena bikèngela bwa kwikalaci mwaba kampanda munene mulongolola bimpè to.



29 Yakòbò musangu kampana wàkakòka dibwe ne kutèekelayèpu mutu, ne ciine aci cìcìdi anu ciitabiiibwe leelu ewu ne n'Dibwe dya Dibanji. Anyi, Dibwe dya Dibanji, dìcìdì anu bantu banene bàà pa buloba bàngata bènda bènda ne dyòdì dibwe adi, bwa kubanjijilapù bamfumu ku lusongo lwa diine dibwe edi, kadi pààdi anu dibwe dyetu dya patupu dya kale dya disanganyibwa mu mpàta edi's.

Beetèlà's ùvwa anu mushiki wà mabwe mambakaja pa makwabo, kadi kulwaci nzubu wa Nzambi, cisòmbedi. Yakòbò wàkamba ne: "Ewu kî mmwaba mukwabo kaayi to anu nzubu wa Nzambi." Kadi pààci anu mushiki wà mabwe mambakaja pa makwabo.

30 Kabyena bikèngela anu bintu binène bilongolola bìmpè to. Bidi bikèngela bupwekèlè bwa diitabuuja bwa kwitabuuja, ki cìdì cìkèngelà. Ki cìdì cyènza bwalu abu ncyòci aci.

31 Mpindyewu, bu mùdìbi ne mu katanci emu dìbà didi dípita, netuteete bwa kubenga kunulama ntanta mupite bule, bu mùdìbi ne kùdi luuya lukole ne ekeleeziya mupàte ne bantu. Pa nanku nèngààkulèku neenu anu munda mwa katanci kakese cyanààna mu dinda emu, pa kaacyena-bwalu kakese kaaba aka kàdì kafwànyine. . . Ndi mutwishiibwe ne nekìikale dyambulwisha kunùdì. Nenku mpindyewu mèmè, kumpala kwa kuumuka kumbelu, mvwa mufunde tuntu tukese tusatu anyi tunaayi. Mèmè kwamba ne: "Nèngānji kwindila bwa kumona cìdì Mukalenge mufwànyine kwenza ne ngààkulèpu pāngāāfikā kuntwaku." Ndi mufunde tuntu tukese tutwè ku tusambombo kaaba aka, tuubyena-bwalu tukese, ne ndi mufunde kamwe, kukèèla mu mpaayà mushindu ewu. Mèmè kudyambidila ne: "Ee, pāngìikalā nkāādì mubānde mu cyambilu pāmwāpa Yèyè neangambile cintu kampana cya mèmè kwakulapu." Mpindyewu ndi nsanganyibwa kule menemene anu mùmvwà kwòkù aku amu. Pa nanku, nansha bishi, nēmbalè Mufundu kaaba aka, Mukalenge àtwāmbūlwishèku bwa kuWūmvwa. Nshapita wa 14 wa Luukà Munsantu, nenku tūbangilāāyi ku wa makumi asatu ne. . . mvnasa wa 31 wa nshapita wa 14 wa Luukà Munsantu.

*Anyi mmfumu kaayi, pàdìye ùya bwa kalwangana mvita ne mfumu mukwabo, kàyikù wānji kusòmbela panshi, ne ùkonka ní mmukumbane ne binunu dikumi mwa katwilanganaye ne ewu ulwàlwa bwa kulwangana nende ne binunu makumi abidi awu?*

*Anyi kabidi, pàcìdìye anyi. . . pàcìdìye mu ntanta mule menemene apu, ùdi útuma mùlòpò, ne ùjinga nsòmbelu wa ditalala.*

*Bya mwomumwe kabidi, ewu yònsò wa kunùdì. . .*

32 Ndi muswe bwa nutangile ne ntema. Mpindyewu Yèyè mmwanji kwamba ne. . . Ndusumwinu. Mwambe ne:

“Mpindyewu, kùdi mfumu munkaci mwa kulwa, ne ùdi ne basalaayi binunu makumi abidi; kadi ewu mfumu yêyê ùyaaya bwa katwilangana nende, kadi mwikàle ne basalaayi anu binunu dikumi cyanàànà. Nenku dībà adi, cya kumpala, ùdi ùsòmbela panshi ne ùdikonka nī mmudilongolole, ní ùdi mwa kwangula mpasu anyi to.” Eyo.

*. . . wa kunùdi udi kàyì ùshìya byònsò bìdiye naabi to, yêyê kèna mwa kwikala muyiidi wanyì to. (Nwamonu anyi?)*

<sup>33</sup> Mpindyewu Mukalenge àsakidilèku dibenesha Dyèndè ku Dìyì edi. Mpindyewu netwinyikàayikù mitu yetu bwa katanci.

<sup>34</sup> Taatù wetu wa mu Dyulu, Wèwè Udi mumanyi wa bintu byònsò, ne udi kùyì ùtàngila buumùntù bwa muntu, bwalu muntu ùdi cinyì mene’s bwa Wèwè kumuvuluka? Wèwè ngwàkenza muntu, ne yêyê ùdi anu mùdi cilòngò cya mu mpàtà: leelu mmulenga, mààlàba ùdi ùkòshiiibwa, wèdiibwa mu mfuulù, ne ùfùbidila. Nenku ndi nKulomba, Nzambi, bwa kwikalaku neetu luse leelu ewu ne muntu ne muntu ùdibalùlùlèku bwalu ne bwalu leelu ewu. Tudi kaaba aka bu mu nzubu wa kulongolwela bilema. Tudi apa mbwa kuyiila ne kumanya mwa kusòmba, ne enzaku bwa biine abi bifuminè ku Dìyì Dyebe leelu ewu, Éyì Nzambi wa Cyendeleele. Bààbùngì bàà ku bânà Beebe mbasangile, ne bààbùngì bàà kùdìbo bàdi bânà Beebe kùkaadi bidimu, kadi, nansha nanku, nyewu twalukila bònsò ku nzubu wa Nzambi, bwa kuyiila, bwa kumanya. Ne mèmè, musadidi Webè ewu, ndi njingakù kutàmba kuKumanya. Nenku ndi ndomba bwa Watwàlakù disonsola dya Evanjeeliyo pa twètù bònsò, pa musadidi Webè, ne bwa Bwikadi Bwebe, ne ditùsonsola Dyebe mu citanda cijimà emu, bìikalè binène be leelu ewu, bwa twètù kuumuka, twenda tujinga munda mwa myoyi yetu, bwa kwikala basadidi Beebe batàmbe bwìmpè, bwa ne kwikalangana kwètù kaaba aka kwikalè ne mushinga kutùdi. Éyì Nzambi wa luse, filakù mabeneshà aa mu Dìnà dya Yesu, Mwan’Èbè. Amen.

<sup>35</sup> Mpindyewu Mukalenge àsakidilèku mabeneshà Èndè ku Dìyì edi patudì tubala apa. Ndi muswe kwangata cyena-bwalu mu dinda emu, cya ne: “Nyuma miseeswishi anyì Dìyì dya Nzambi?” Mpindyewu, ncyena-bwalu cya pabwàcì, kadi bu mùdìbi ne mmu tabernacle. . . Nenku mu diisàtù diloolo dishààle. . . Mu dyalumingu dishààle mu dinda mvwa ngaakula pa ci—cibilù cikese cya disanka cya Evanjeeliyo.

<sup>36</sup> Nenku mu diisàtù diloolo dishààle mvwa nyiisha pa mukaji uvwa ne citaata kumutu kwèndè, anyì. . . Yêyê kujimija umwe wa ku mpàlatà yèndè ya mfranga, ne ùvwa ùkòmba mu nzubu ne ùtàta bwa kumupeta kumpala kwa bayende kulwaye. Nenku twètù kufika ku dijandula ne mwine mukaji awu ùvwa mmukaji wa mushindu wà bakaji bàà kùdi dībà dipàtukila, ne yêyè. . .

ne mwikàle cileejilu cya Ekeleeziya. Ne kale wàwa kabàvwa bàvwàla cipungidi cya dibaka ku munu to. Bàvwa bàcìvwàla ku mutu, ciikàle ne mpàlatà ya argent citeema myasakù. Ne pàvwà mukaji ùshààla ndumba, bàvwa bàtùùla mpàlatà wa argent umwepele nenku aci civwa cileea ne yèyè ùvwa ndumba. Ne pa nanku mukaji ewu ùvwa mujimije umwe wa ku mpàlatà yèndè ayi, kàyi ndumba to. Kadi bayende ùvwa muumuke, ne mukaji ewu ùvwa ùlwijakaja bwa kupeta mpàlatà awu, bwa kumwalujaye ku citaata cyèndè aku, bwalu pàvwà bayendè mwa kulwa ùvwa mufwànyine kumanya ne bàvwa bakwàte mukajende awu mu bundumba, ne cìvwa cifwànyine kufikisha ku dikosoloka dya dibaka ne bikwabo. Ki mèmè kwangata aci bu cileejilu mu katanci kakese bwa ekeleeziya, udi mujimije bintu binène bùngì cyanàànà. Ne dībà dyākànyì bwa Taatù kulwaYe, pa nanku bìdi bikèngela bwa twètù kuya twenda tuebanganana naabi. Mpindyewu, bu mùdibi ne mu ekeleeziya, ne mu tabernacle wetù. . .

<sup>37</sup> Nenku ndi—ndi muswe kwakula pa *Nyumà Miseeswishi*, cidi bulelela cifwànyine kupeeshiibwa cyena—bwalu ne *Dilonga Dya Maalu À Baadémons*. Nutu nuumvwa bààkula bikole bwa démons, mu matuku aa, kadi nutu nuumvwa bààkula kakese pa mushindu wà kutuukakana naayi. Twètù bônso tudi—tudi bamanye bìmpè ne démons yitukù, kadi, cintu cidi cìlonà cidi ne, mmunyi mwa kutuukakana ne cintu aci. Nenku mpindyewu kùdi. . . Bu mùdibi ne, ku ngàsà wa Nzambi, ntu ne mpùngà yàbùngì ya kukungamangana ne bintu bìdìbo bàbìikila ne ndémons ebi, kabidi ntwilangana naayi pa cibumba cya ku cyambilu ne mu nsòmbelelu wa ku dituku ne ku dituku, nenku, mona's, ndi muswe kutangila mu Mifundu mu dinda emu anu bwa njandule ne byòbì bintu abi mbinganyì.

<sup>38</sup> Mpindyewu, tutu bacyàngàte mu mudimu wà dyondopa, misangu yònsò anu ku luseke lwà dyondopa. Kansere, cyùjà cya kansere, lusòngà, dĩaamà dya cyàdi, bintu byònsò abi kì mbintu bya mu bufuki to, mbya bitàmbe—mfùkilu ne bìdi ndémons. Mifundu yidi yishindikà patooke cyòci aci. Kadi ndémons mu mubidi, miikàle ne byùjà, bu mùdi kansere, kiikàle ne mwoyi munda mwàkù, ne mwoyi wàkù awu ndémon. Cyùjà cya lusòngà, ditampakana dya disaamà dya cyàdi, anyì dya mäsàamà makwabo, ndémons. Aci mmu mmwenekelu wa mubidi.

<sup>39</sup> Mpindyewu, mu dinda emu netwàkulè—twàkulè pa démons mu mmwenekelu wa nyuma mu musuuka. Yidi mu musuuka anu mùdiyi mu mubidi amu. Ne tudi ne cya kwitaba ne tutu tuyimòna mu mibidi ya bantu, bu mùdi kansere ne—ne mäsàamà mashìlèshìlàngàne àdì mu mubidi wà buntu awu.

<sup>40</sup> Anu abidi àdì panshi aa, nansha kansere kiine mbajuuke e kwamba ne ndĩaamà dya mu cipaapu ciinàyi, ne didi mu cipaapu cikwabo. Bushuwa, ndilonga maalu a baadémons.

Dìsaamà dyònsò edi ndìsaamà dya cipaapu ciinâyì, ntwadijilu wadi.

<sup>41</sup> Mpindyewu, kadi mpindyewu kansere mu mubidi anyì kansere mu musuuka, démon ùdi mwa kubwela mu myaba yònsò yibidi ayi. Mpindyewu kùtu misangu yàbùngì ne bantu bààbùngì ne meeji mîmpè biikàlè. . . ne bantu bîmpè biikàlè bàteeta misangu yàbùngì bwa—bwa kwikala beeyèmène pa kaateòlòjî kakese kampanda kàdìbo naaku, anyì cintu kampanda cidìbo babàlongèshe kacya ku bwànà, kadi bacìkàlè bàsangana ne munda menemene mwa buumùntù bwàbò, munda menemene mwa musuuka wàbò amu, bwa ne bàcìdi anu ne kantu kampanda kàdì kakàyi kajaalàme to. Nwènù, bàbùngì bàdì apa mu dinda emu aba, kakùyi mpatà to mwaba kanà wònsò wunùdi nusangana beena Kilisto badìsangìshe, nudi nusangana bantu biikàlè ne yòyi nyuma ayi munda mwabo, mu mushindu wà ne bàdì. . . Ncintu cidì kacìyi cya kujingakù to. Kì mbayiswe to. Bàdì bàmba ne: “Kaa, ngìkalakù anu mwa kulekela kushima’s! Ngìkalakù anu mwa kulekela kwalakana’s! Ngìkalakù anu mwa kulekela *cikampanda* anyì *cikansanga*’s!” Mpindyewu, ayi ndémón. Nenku, mpindyewu, yìtu yìlwa mu mmwenekelu wa ntendeleelu, misangu yàbùngì. (Bu mùdìbi ne nkalaasa kàà Dyalumingu, ncikondo cya kulongesha, pa nanku tùtangilàayikù ne dísù ditwe mu bwalu ebu.) Mpindyewu, yìtu yìlwa mu mmwenekelu wa ntendeleelu, misangu yàbùngì.

<sup>42</sup> Mpindyewu, mu Mifundu, musangu kampanda, kùvwakù muntu dînà dyèndè n’Yèhoshàfàtà, muntu munene, mutendeleedi. Ki kuyaye kùdì mfumu mukwabo uvwa mfumu wa—wa Izaleela. Kadi yéyè, Yèhoshàfàtà awu, ùvwa mfumu wa Yudàayà. Ki kuyaye kùdì Aakàbà, mfumu wa Izaleela, ki kulwabo bònsò baswikàkàne bikolè bu mukaba ne cilàmbà, ne kwenzabo cipungidi muntu ne mukwèndè, bwa kuyabo kalwangana mvita mu Laamòtà-Gilàdà. Kadi bàakacyènza kabàyi banji kusambila to.

<sup>43</sup> Kaa, bu bantu mwa kumanyakù’s wè! Ki bwa cinyi ndi mulwe mu dinda emu ne munulombe bwa kumvùlukakù pànyaayà dyàmwàmwà dya mbù apa. Mu maalu ònsò, kusambila!

Muntu mukwabo ùvwa mulwe dituku adi ne kwambaye ne: “Mwaneetu Branham, udi welakù meeji ne mbibì bwa kwenza cintu kampanda anyì?”

<sup>44</sup> Mémè kwamba ne: “Udi ungeela alu lukonko bwa cinyi?” Nwamonu anyi? Kwòkù lukonko mu meeji ebe, cilekèlè, kucyènjiku to nansha kakese. Shààla wèwè anu ne cyòci aci. Paùdi ubanga kwenza cintu kampanda nansha cinganyi, kwòkù lukonko lwa ne ncîmpè anyì ncibì, shààla kule naaci. Kùdyèdimu to nansha kakese, dîbà adi udi mumanye ne udi mubinge.

45 Mpindyewu, bikèngela bwa maalu ônsò, kwanji kwelanganapù meeji mu disambila. “Anji kebaayi Bukalenge bwa Nzambi ne bwakane Bwèndè, nenku bikwabo bintu byônsò ebi nebanusakidilebi.” Ndi mutwishiibwe menemene mu dinda emu ne, bu balume ne bakaji anu mwa kubwelaku mu kaaba kàà ne misuuka yabo, ngeelèlù wabò wa meeji, lwidì lwabo, biikàle bipwàngàne ku mèsù kwa Nzambi, awu’s mmufwànyine kwikala umwe wa ku ekeleeziya ya mitàmbe bukole yikaadiku kacya.

46 Anji tàngilàayi anu katanci kakese cyanàànà luseke lwà mubidi. Mpindyewu, twètù, tudi, misangu yàbùngì, kùkaadi bidimu, tudi ne citùdì tubiikila ne “citandudi cya dishima.” Udi mwa kucitèeka pa dinungu dya cyanza cyebe apu, bàtu bàcyàsa cinyùngùlùkile mutu wàbò—wàbò, nenku udi mwa kubwelamù ne kuteeta ne mwebe mwônsò bwa kwenza ne dishima dyùmvwike bu bulelela, kadi dîbà dyônsò necifunde anu ne kí mmwômò to, bwalu muntu kàtu mwenjiibwe bwa kwikalaye ùshima to. Dishima ncintu ciseeswishi, cikole be, cibi be. Mbipiciibwe ne mèmè mwikàle ne mukwaciki wa maala, dituku kanà dyônsò edi, pamutu pàà mwena mashimi. Nwamonu anyi? Mwena mashimi! Ne mubidi wèbè awu kawùtu mwenjiibwe bwa kwikalawu wùshima to. Nansha wèwè mubiipe wa bishi, wèwè udi anu mwànà wa Nzambi mudishinde. Muntu wa mutàmbe kubiipa mu cimenga eci leelu ewu, Nzambi kàtukù mukujingile bwa wèwè kwikala mubiipe to. Yèyè ùvwa muswe bwa wèwè kwikala mwan’Èndè wa balume anyi wa bakaji. Wèwè udi mwenjiibwe mu mushindu Wèndè Yèyè mwine wùdìYe. Kadi mpekaatu ngudi mukufikishe ku dzenza nanku awu. Nenku nansha wèwè uteeta munyì bwa kutentula anyi uteeta mwa kukwatakaja bwa mashimi kumwekawu bu majaaname, bôbò bàdi ne cyamu cya mu maalu a mamanya cidì cijaadikà ne kí mmwômò to. Wèwè udi mwa kucyàmbilangana ne mwoyi mutooke wônsò wùdì peebe muswe kucyàmba naawu awu, kadi cyamu aci necifunde anu ne kí mmwômò to; bwalu kùdi kandòndò munda mwa muntu, ne kòkò kandòndò aku nkamanye cidì bulelela. Nenku cyùdì wamba lwà pambelu apa nansha ciikàle cinyi, kandòndò aku nkamanye ne mmashimi, ne cyamu aci necifunde cidì mu kandòndò aci.

47 Ki bwa cinyi, bu mulume anyi mukaji mwa kwangatakù meeji èndè ne bujaadiki bwèndè ne nsòmbelu wèndè ne kubitèeka mu njila wa Nzambi (amen) mu mushindu wà ne kajila kàà Nyuma Mwîmpè nekìikalè anu menemene cintu cimwe ne Nzambi, ciine cidì cifwànyine kwenzeka’s wè! Bu mulume anyi mukaji mwa kuditèekakù mu njila, biikàle ne budishikaminyi munda mwa mwoyi wabo, ne diitabuuja dya dyùmukila munda menemene mwàmwa!

48 Bantu bààbùngì bàtu bàlwa ku cyoshelu bwa kubasambidilabo, biikàle ne diitabuuja dya mamanya a mu mitu.

Bàdi bàtonda mpekaatu yabo ne bàdishiya bàà mu ekeleeziya, ku diitabuuja dya mamanya a mu mitu. Bàdi bàciitabuujiila mu mitu yabo—yabo. Bàdi bàciitabuuja bwalu mbumvwe bàcyàmbe. Bàdi bàciitabuuja bwalu ki ngenzèlù udi mutàmbe bwimpè. Kadi kî ng'aci cidi Nzambi ùtàngila nansha. Yèyè kèna ùtàngila diitabuuja dyebe dya mamanya a mu mutu adi to.

<sup>49</sup> Yèyè ùdi ùtàngila mu mwoyi, munda mmùdi Nzambi. . . Ne pàdici cifùmina mu mwoyi, bintu byònsò bidi mwa kwenzeka díbà adi. Ditonda dyebe didi dítwilangana ne nsòmbelu webè. Nsòmbelu webè ùdi wàkula ne díyi dikolè anu mùdi ditonda dyebe dyàkula amu.

<sup>50</sup> Kadi pàdi ditonda dyebe dyàmbe cintu, ne nsòmbelu webè wènzà cya cyanààna, kùdi cintu cipampalàmùke mwaba kampanda. Aci mbwalu wèwè udi ne diitabuuja dya mamanya a mu mutu, kadi kadìyi diitabuuja dya dyùmukila mu mwoyi wèbè to. Nenku aci cidi cìleeja ne lwà pambelu, *apa*, pàdi dimanya dya Nzambi; kadi munda, *emu*, mùdi démon wèla mpatà. “Ndi ngiitabuuja dyondopa dya kùdi Nzambi, kadi kadyena bwànyì mèmè to.” Nwamonu anyì? “Aa, mbifwànyìne kwikala nanku’s, kadi mèmè ncyèna nciitabuuja to.” Nuuvù anyì? Pambelu, wèwè udi wamba ne “eyowa”; munda, kondo keebe kàà mwoyi kàdi kàmbe ne “to.” Cyamu cyòci cimwecimwe cya mu maalu a mamanya aci’s ncifwànyìne kujaadika ne kacìvwa bulelela to, kucijaadika.

<sup>51</sup> Monaayi pàvwà bamfumu aba, kumpala kwa kwasabo lwendu, s’bivwa bìkèngela bwa kwikalabo banji. . . Kumpala kwa Yèhoshàfàtà kwikalaye mwenze cipungidi aci ne Aakàbà, s’bivwa bìkèngela kwanjiye kwikala mwambe ne: “Tusambile bwa kumonabi cidi diswa dya Mukalenge.”

<sup>52</sup> Mpèèshaayi mèmè muiishi, mpèèshaayi mèmè mwena Kilisto, mpèèshaayi mèmè mukaji wa nzubu udi mwena Kilisto, mpèèshaayi mèmè cidimè, anyì mwena mudimu wa mu cyapù kampanda, wa wànji kutèeka Nzambi pa kaaba kàà kumpala mu maalu ònsò, nènùleejè muntu wátuuta dyakalenga nansha kwòkù cyònsò cidi dyabulu mwa kutèeka pambidi pèndè aci. Yèyè, ùdi wànji kukeba Nzambi. Dyambedi tudi ne cya kwanji. . .

<sup>53</sup> Kadi bóbò kabààkenza nanku to. Bàvwa bònsò babwikila kùdi ditutu bwalu Aakàbà ùvwa ne bukalenge bunene bwa bùbàlakana, ne ùvwa mwenze bintu bùngì cyanààna, ne ùvwa ne bivwàlù byèndè binènè bya bìbàlakana, ngòlò yèndè ne argent, mulwe muntu munene, mutante muye kumpala, kadi pèndè mwena bupidya’s.

<sup>54</sup> Nenku ki mwaba wùdi bàà pa buloba bàsanganyibwa leelu ewu ngwòwò awu. Ki mwaba wùdi Amerike mwimane leelu ewu ngwòwò awu. Ki mwaba wùdi ekeleeziya miimane leelu ewu ngwòwò awu. Tudi bilbàke yimwe ya ku ekeleeziya

yidi mitàmbe bwîmpè ya kacya biibaka. Tudi bapetè bamwe bàà ku bamanyi bàà mabàlà batàmbe kuvwijiibwa bàà kapelu bàà kacya twâpeta. Tudi balongeshangane teòlòji mutàmbe bwîmpè, ne bikwabo, ne bayiilè mwa kwimba bu Banjelo, kadi pààkù kwikàle butekete mwaba kampanda. Kùdi butekete, bwalu mbaye bènda bàlonda dilongesha dya bantu ne nyuma miseeswishi, pamutu pàà kwalukilabo ku Dîyi dya Nzambi. Bàdi bàteeta kwenza bwa bintu kufwananganabi ne bya bàà pa buloba. Mbateete bwa kutèekapù bukênkè bwa bùbàlakana, bu mùdi Hollywood.

<sup>55</sup> Muneemu emu dituku adi, dingumba dinene kampanda dya dyendè luumu, dya mu cipaapu cya Evanjeeliyo mu Kaabujimà mu Kansas City, anyi, mfwilaayikù luse, mmu Denver, ku mpungilu, didi munkaci mwa kwibaka ekeleeziya wa ùyiila mùliyò mujima wà ndola. Kadi pààbi bampandanjila binunu ne binunu bindile bwa kupeta anu centimes makumi ataanu yetu eyi kùdi dyòdi dingumba dimwedimwe adi, bwa kutwadilabo bampangaanu Evanjeeliyo. Cidi citùkèngelà leelu ewu nditabuluja dya bantu bàà meeji a bumpandanjila, batùma kùdi Nzambi, balediibwe kùdi Nyuma Mwîmpè, biikalà ne lukunukunu lwà Nzambi, bwa kuya kabwela mu bisuku ne meetu mwàmwa bwa kwenzakù cintu kampanda bwa Nzambi, pamutu pàà kwibaka ekeleeziya minene milenga, ne kuteeta bwa kutàmbe ya beena mutumba.

<sup>56</sup> Bwànyì mèmè mbipiciibwe ne biikàle tukuukwila mu citanda, mùdibo anu bakòmbè cyanàànà, anyi mu cinwinu cya maala, cibi mwikàle ne budishikaminyi bwa Nyuma Mwîmpè ne dinanga dya Nzambi dilàkuka kapyà mu myoyi, pamutu pàà kusòmba mu kàtèdralè kàà katàmbe bunene katùdiku naaku pa buloba ne kwikala mucintamija kùdi malongesha ne mèyi maswika a bantu. Cidi citùkèngelà leelu ewu nditabuluja dya dinyùkusha, kwalukila ku Bulelela, kwalukila cyakabidi ku Dîyi dya Nzambi.

<sup>57</sup> Mpindyewu pààkayàbo kuntwaku, pàvwa mpaanyima pàà Yèhoshàfàtà mwenze bu mwalùkilekù mu yèyè mwambe ne: “Kwènàku ne . . . Ee, tukankebi Mukalenge bwa bwalu abu.”

<sup>58</sup> Awu ne: “Eyo,” mwàkambà Aakàbà, nenku kutumaye mukenji ne kwangatabo bayiishi lukama, nkama yinaayi milongesha bìmpè. Ki kulwaye naabo mwaba awu ne kwambaye ne: “Bònsò aba mbambi bàà biprofeta.”

<sup>59</sup> Ki pa nanku kutuukabo nyuma, ne kubangabo kusòka. Ki kwambabo ne: “Eyo, Ndààku mu ditalala. Mukalenge ùdi neebe.”

<sup>60</sup> Ki pashiishe paanyima pàà nkama yinaayi yònsò ayi mimanè kufila bujaadiki bwa ne bàvwa ne cya kuya kuntwaku mu ditalala, kadi bu mùvwà Yèhoshàfàtà mumanye. . . Nudi bumvwe aci anyi? Nwamonu’s, munda menemene mwa mwoyi wà

muntu mwakane awu mùvwa cintu kampanda cimwambila ne kùvwa kamvùmvù mu mùsonà mwaba kampanda. Kùvwa cintu cipampàlàùmùke.

<sup>61</sup> Aakàbà kwambaye ne: “S’tudi naabo nkama yinaayi kaaba aka, ne biikàle diyì dimwe, yònsò wa kùdibo wàmba ne: ‘Ndààku, Mukalenge ùdi neebe.’”

Kadi Yèhoshàfàtà kwambaye ne: “Kwènàku ne mukwabo anyi?”

<sup>62</sup> Awu ne: “Ee, mukwabo ngwa cinyi udi utùkèngela’s, patukaadi bamanè kwikala ne bantu nkama yinaayi bàà dilonga dya tulaasa ditàmbe bwimpè mu ditunga? Bònsò’s nya’ bàmba ne ‘Ndààku!’” Aci cìvwa cya mamanya a mu mitu. Kadi munda mwa mwoyi wà Yèhoshàfàtà yèyè ùvwa mumanye ne kùvwa cintu cipampàlàùmùke. Mpindyewu, kwambaye ne: “Tudi ne mukwabo, m’Miikà. Kadi mèmè ntu mumukine.” Yèyè ne: “Yèyè ùtu misangu yònsò anu wàmba cintu kampanda cya cibì, ne ùlàsulangana ne maalu pàdiye kàyimù ne bwalu to, ne mwikàle ùpwekesha maekuleeziya milongo ne bikwabo byònsò.” Yèyè ne: “Mèmè ntu mumukine.”

Awu ne: “Ndààku, kamwangate, bwa twänjìbi kumona cyàmbye aci.”

<sup>63</sup> Nenku pààkalwà Miikà, kwambaye... Bòbò kwamba ne: “Mpindyewu, tangila, wàmbe cintu anu cimwecimwe cidi bakwebe bambè aci.”

<sup>64</sup> Yèyè kwamba, yèyè kwamba ne: “Nèngìikalè anu...” Ki cintu ncyòci eci. “Mèmè nèngàmbe anu cidi Nzambi wàmba.” Amen. “Cidi wenù muprofeta wàmba aci nansha ciikàle cinyi, ne cidi *cikampanda* cyàmba, ne cidi ekelezeziya wenù wàmba, ne cidìbo bòbò bàmba, mèmè nèngàmbe anu cidi Nzambi wàmba. Nzambi mmutèèke pa mishiku yànyì ne mèmè nèngàmbe anu cidiYe Yèyè wàmba aci.” Cidi citùkèngelà leelu ewu mba-Miikà bakwabo biikalà mwa kwamba cidi Nzambi mwambe. Monaayi, ki kulwabo nende mwaba awu, ki kwambaye ne: “Mpèèshaayi bufuku ebu.” Ki bufuku abu Mukalenge kutwilanganaYe nende, nenku yèyè kwalukila pàakacyàbu mu dinda. Pàakasòmbà bamfumu babidi abu mu ciibi, yèyè kwamba ne: “Ndàayi.” Yèyè ne: “Ndàayi. Kadi,” mwàkambàye, “ngàmònu Izaleela mwenze bu mikooko mitangalake kayiye ne mulami to.”

<sup>65</sup> Ki muyiishi mukwabo ewu, muvwale ne ku ménù, kulwaye tamakatamaka e kumubangulaye dipi ku mishiku, kwambaye ne: “Nyuma wa Nzambi mmuyiile penyì pàpàtukuYè mu mèmè?”

Awu ne: “Neujandule pawàlukilà.” Eyowa.

<sup>66</sup> Yèyè ne: “Tèèlejà kuneeku!” Yèyè ne: “Twètù tudi basadidi bàà Nzambi. Tudi twètù nkama yinaayi, kadi wèwè udi nkààyebe.”



67 Kadi Miikà kwambaye ne: “Mémè nènwwāmbilè mwaba wùdì lutatu lwenu lùsanganyibwa.” Amen! Yèyè ne: “Ndi mumone cikeena-kumona.” Amen! Yèyè ne: “Nenku mémè kumona Nzambi musòmbe mu Nkwasa Wendè wa butumbi. Mémè kumona cilwilo cya mu Dyulu cii mànè ciMunyungùlùkile. Ne twètù aba tudi bamanye ne Dìyì dya Nzambi ditu dyambe mèyì a milawu pa muntu ewu, bwa mushindu wùdìye mwenze.”

68 Kwèna mwa kubenesha cìdì Nzambi mwele mulawu to, nansha dyabulu pendè kèna mwa kwela mulawu cìdì Nzambi mubeneshe to. Abu mbwalu bwa muntu-nkààyà, nansha yèyè mwikàle mupele anyì mukùtākàne, nansha kàyì mumanye mukanda, nansha kàyì mulonge kalaasa. Cìdì Nzambi mubeneshe ncibeneshiibwe. Cìdì Nzambi mwele mulawu ncyediibwe mulawu. Manyàayi dishiilangana pankaci pàà cìdì cìmpè ne cìdì cìbì.

69 Miikà ùvwa mumanye anu bìmpè menemene ne uvwa ne bayiishi abu awu kàvwa m’Mukalenge to. Ee, cìvwa cìbì kùdì bayiishi abu ncinyì? Monaayi cyàkenzàbo. Bàvwa bavwādika ne ku mènù. Bàvwa bàdìishiibwa nshimà ya maanyì. Bàkaavwa badisangishèsàngishe mu maafètes abo ne bikwabo, ne bipungidi byabo, mu mushindu wà ne bàkaavwa bakafikè mu mwaba wà bamanyè anu teòlòjì wabò bóbò awu. Ne Bible mmwambe ne Miikà, pàvwàye ùtàngila mu cikeena-kumona apu, wākamba ne: “Nzambi kwambaYe ne: ‘Nganyì utùdiku mwa kutuma bwa kupweka ne kuseeswisha Aakàbà?’ Ki nyuma kampanda wa mashimi kwambaye ne: ‘Mémè nēmpwekè kuntwaku ne nēseeswishilè Aakàbà ku bayiishi abu, bwa kufikishabo Aakàbà ku diya kuntwaku, bwa kufikisha Dìyì dya Nzambi ku dikumbana.’”

70 Mpindyewu, leelu ewu bantu bààbúngì menemene bàdì bàtèèleja. . . (Mpindyewu, kalaasa kàà Dyalumingu, mémè ntu mukàngè.) Tàngilàayi, bantu bààbúngì menemene bàdì bàtèèleja nyuma miseeswishi pamutu pàà kwangata Dìyì dya Nzambi. Nyuma ayi, yidi pa buloba. Yidi ndémóns. Ne yidi yikabwela mu myaba kampanda ne yikabwela munkaci mwa bantu, bambi. Yidi yikabwela munkaci mwa bidimba bya ekeleeziya. Yidi yikabwela munkaci mwa bantu bimpè. Ne yidi yikabafikisha ku dibwela mu byejeeji. Nenku bàdì bàmba bintu, ne bènza bintu, ne bàlongesha bintu, ne bàtèèka bintu mu cyenzi, bìdì bìbènganganà ne Dìyì dya Nzambi. Leelu wa Ndaaya ewu, bambi bàà disangisha dyabo bàdì bàànyishila bantu bààbo bwa kwikalabo bànàya twarta mu maekeleeziya, bààbúngì bàà kùdìbo. Mpindyewu, kabyena anu beena Katolike nkàayaabo to, kùdì beena Mishònyì búngì cyanànà bàtù bènza nanku.

71 Cidìbo bateete kwenza aci ncintu cya mupinganyi. Mbateete kutèeka ndongamu kampanda mupyamupya. Mbateete kutèeka dilonga dya tulaasa, bwa kwangatadi mwaba wà Nyuma

Mwímpè. Kanwàdyàkupetakù mwa kucyènza to, nansha muntu wenù mulonge tulaasa munyi. Ndi ngeela meeji ne ncintu címpè bwa kwikalaye mulonge tulaasa. Kadi yêyè kàyi ne Nyuma Mwímpè pamwe ne cyôci aci to, dilonga dyèndè dya tulaasa adi kadyàkumukwàcishakù to. Dilonga dya tulaasa kadyàkwangataku mwaba wà bulombodi bwa Nyuma Mwímpè to. Amen.

<sup>72</sup> Monaayi, bôbò, pamutu pàà Cyôci eci, mbateete bwa kutèeka dilabulangana dya ku cyanza pamutu paa dilabula dya cyenakale ditùvwàku naadi kale wàwa adi. Leelu ewu ekeleeziya wàshàadi wa cyena-leelu. Bàdi bàya bàpèeshangana mwoyi wà ku cyanza wà bunyàànà, ne mbyenze anu bu ne ki mùdìbo bàcyènza's. Kadi kacýàkwangatakù mwaba wà cibasa cya badidi bàà myadi kùvwà bangènzàmpèkààtù bàsòka bwa kudilongolola kumpala kwa Nzambi nansha. Aci ncyà bushuwa.

<sup>73</sup> Leelu ewu bàdi bàteeta bwa kwangata kaaba kàà cyadiikumi cya Nzambi. Bàdi bàteeta kutèeka cintu kampanda. Bàdi bàteeta bwa kucivwija cishùllàngàne. Bàdi bàya bàkenza manayi a mubèlè mu maekleeziya, bànyà PMU. Manayi a PMU kaàdyàkwangatakù kaaba kàà cyadiikumi cya Nzambi to. Madya, dipàányisha dya mambùlankètè, madya a pikiniki, bwa kuvudija mfranga bwa kufuta mabanza mashùllèshùllàngàne, kabyàdyàkwangatakù kaaba kàà cyadiikumi ne mulambu bya Cyendelele bya Nzambi to. Kabyàdyàkucyènzakù to. Kadi pèètù's tudi tuteeta anu mwa kubyènza.

<sup>74</sup> Ncinyi aci? Nnyuma miseeswishi ayi yidi yitùùluka, yiteeta bwa kufila mupingany-. . . kufila mupinganyi pa kaaba kàà Diyì dya Nzambi. Nzambi kàtukù ne mupinganyi pa kaaba kàà Diyì Dyèndè to. Dyòdi ndya Cyendelele ne dya kashidi. Nzambi kàtu ne mupinganyi pa kaaba kàà diitabuujà to. Diitabuujà kaditu ne mupinganyi to. Ditekemena kadyàdyàkwangatakù kaaba kàà diitabuujà to. Diitabuujà ditu nkààyaadi. Ditu anu pàà nkààyaadi. Kadyàdyàkwangatakù. . . Ditekemena kadyena mwa kwangatakù kaaba kàadi to. Ditekemena ncintu cya bàlenga ne byanza bwa bintu bitekemena, cileeji cya bintu bidì kabìyi bìmweka, anyi diitabuujà's wè, eyowa. Nwamonu anyi? Ditekemena ncintu pa bule; diitabuujà ncintu cikwabo pàaci. Ditekemena didi dyòdi dicitekemena; diitabuujà didi naaci. Eci cidi diitabuujà dya mamanya a mu mutu; kadi cikwabo eci ndibuulula dya buludi dya kùdi Nzambi. Kacyàkwangatakù kaaba kàadi to. Tudi tuteeta, kadi tudi tukwatakaja mipinganyi yònsò eyi.

<sup>75</sup> Twètù tudi tuteeta kwibaka ekeleeziya minene pamutu pàà twètù kutuma bampandanjila. Mupinganyi mukwabo's. Kacya Yesu kààkatùminakù muntu dīyī bwa kwibaka ekeleeziya to. Kacya adi dīyī kaditukù ditùmībwe mu Bible to. Twètù tudi biibàke maaseminere, s'mbenze bwa aci kwangataci kaaba kàà bumpandanjila. Twètù. . . Kacya Yesu

kààkatwàmibilakù bwa kwibaka seminere to. Yìdi anu mîmpè. Dilonga dya tulaasa, biikàle tuteeta bwa kwenza bwa aci kwangataci kaaba aku. Kacyàkukàngatakù to. Mudimu wà Yesu wàkatùmanganàYe naawu wùvwa wà “kuya pa buloba bujimà bwa kuyiisha Evanjeeliyo kùdì bifùkùlbwà byònsò,” bwa cikondo cya nshiiikidilu. Pa nanku mipinganyi yònsò yitùdì naayi kayàkwangatakù kaaba kàà cishùwashùwàle aci to.

<sup>76</sup> Dituku adi mvwa mwenze dilabula, mupinganyi. Mémè kupeta dînù dinsaama bwa musangu wànyì wa kumpala, kugengelabi bwa kuntuulabo dînù. Mu dinda emu ndi ne dînù dya mafi dipàyikamù. Ndi ngaakula ne lutatu. Dyòdì adi kadyàdyakwangatakù kaaba kàà dya bushuwa to. To, mukalenge! Kaa, ekelekele!

<sup>77</sup> Udi mufwànyine kwangata muntu ne kumuvwadika bilàmbà ne ku mènù, kumwenza wa dibaya, wa lupemba, cyònsò cyùdì wèwè muswe aci, ne kumwakaja bîmpè menemene. Yèyè kèna ne byumvwilu to, kèna ne kondo kàà mwoyi to. Yeye kàadyàkwangatakù kaaba kàà muntu wetù wa cya bushuwa ewu to. Nansha dikudimuna dya mucima dya mafi dya muntu ùlwa tamakatamaka wamba ne: “Ngàshàadi wa mu ekeleeziya. Nènteetèku bwa kulongoloka.” Kacyàkwangatakù kaaba kàà dikudimuna dya mucima dya cyena-kale dishùwashùwàlè, ditùma kùdì Nzambi, dya Nyuma Mwîmpè didì dîvwijà muntu mushiilàngàne munda mwa mwoyi wèndè adi to. Kadyena mwa kwenzaku aci to, bwalu kakwena Mwoyi munda mwàdì to. Kakwena cintu nansha cimwe cìdì mwa kumupèeshakù Mwoyi to.

<sup>78</sup> Anu abidi adi panshi aa muneemu emu mvwa mumone muzòdì munene wa bimfwànyì uvwa mulwe ne cyòci eci, musongi wa mpingu, ki cìndì muswe kwamba, uvwa musonge lupingu lwà Mòsà elu. Ncyèna mwa kuvuluka dînà dyèndè to bwa mpindyewu. Mmusongi wa mpingu wa beena Ngeelikà. Cyàkamwangata matuku èndè ònsò a mwoyi. Nenku pààkalùfikishàye mu mushindu wà yèyè ùdyàmbidila ne lùvwa lupwàngàne, wàkatùpika ne disanka bikole pa kumona cimfwànyì cya Mòsà aci, mu mushindu wà ne wàkatuuta pa cinù cya lupingu alu, wamba ne: “Akùlà’s, Mòsà!” Lupingu alu lùvwa lùmweka anu bu ne ndwà cya bushuwa menemene! Lùvwa lutentula anu menemene mu mushindu wà ne lùvwa lùmweka bikole anu bu ne m’Mòsà, bwa mu èndè meeji, ki yèyè kutuuta ne kansandu bwa kulùfikisha ku dyumvwaku cintu kampanda.

<sup>79</sup> Cidi citùpèèsha mu meeji ekeleeziya. Nansha wèwè mupingaje cintu pa mwaba wa cikwabo bishi, disangisha dyùdì naadi nansha dyòdì dinene dya bishi, nansha wèwè wimba misambu yebe bilenga bya bishi, nansha beena mu disangisha dyebe bàvwàla bilàmbà bilenga bya bishi, nansha wèwè ne *bikampanda*, *bikansanga*, anyi *bikankenga* bùngì bishi, udi

mufwànyine kutuuta, kuumvwa pàùdì ulenga, anyì cinyì cyònsò. Kacyàkwangatakù kaaba kàà Mwoyi to, piikalà Kilisto kàyi mupweke mu mmwenekelu wa Nyuma Mwîmpè, mubwele mu ekeleeziya awu, ne mucipèèshe dilabula dipyadipya dya mulediibwe cyakabidi. Kacyàkwangatakù kaaba kàà Dìyi dya Nzambi to. Dìyi dya Nzambi ditu pàà nkààyaadi.

<sup>80</sup> Miikà ùvwa ne Dìyi. Ùvwa mumanye ne yèyè ùvwa ne Dìyi. Ùvwa ne Dìyi difunda, ùvwa naaDi kabidi ku cikeena-kumona. Ùvwa mumanye civwà Nzambi mwambe mu Dìyi Dyèndè. Ùvwa mumanye civwà Nzambi mwambe ku cikeena-kumona. Byònsò bibidi abi bivwa bipetangana. Ùvwa mumanyene civwa Bulelela, ki bwa cinyì kààkaciinakù to.

<sup>81</sup> Kadi nyuma museeswishi ewu, tàngilàayi cidiye mwenze, leelu ewu. Bwa kupeta bidimba bya ekeleeziya bipite búngì, bwa kuvwija bidimba bya ekeleeziya bitámbe bwîmpè, mmulekelele biibi bwàshì pa bìdì bitàngilà dilongesha dyònsò dya Nyuma Mwîmpè dya cyena-kale. Mmwanyishile balume bwa kwikalabo bènza maafêtes a tusumbu twa ditanta muntu ne mukwèndè, mu nzubu ya mwinshi mwa buloba mùdibo mwa kanayila manayi. Aci kacyàkwangatakù kaaba kàà cibambalu cya kuulu to, mùvwàbo bàsambila bwa kupeta Nyuma Mwîmpè amu. Mmwanyishile bakaji bwa kwikalabo bàdisangisha ne bàmba mineku ne bikwabo, ne bènza bintu bya budingidingi búngì cyanààna mùdì kamùyikù bwalu bwa nsongo to. Aci kacyàkwangatakù kaaba kàà disangisha dya milombo to. Bakaji, mushindu wùdibo bàpàtuka ne bàvwàla bilàmbà leelu, aci's—aci's ndibùlà dya ngàsà.

<sup>82</sup> Ngùmùvù dìyi dyàm̀bì Mwaneetu Neville adi, wàm̀ba ne: “Beena Amerike bàdì bakwàte ne bya luse aba,” mwàm̀biye, “mbatume bilàmbà byabo byònsò dyàm̀wàm̀wà dya mbù.” Aci's ncyà bushuwa. Bàdì bèndakana bavwàle bilàmbà bya mwinshi. Bàdì...S'ncyà bushuwa. Bàdì ne cya kwikala babipèèshe bampandanjila, bwalu mpandanjila...Bantu ne bampangaanu bàà mu ditunga dikwabo adi mbàdì bàbìvwàla. Aba bantu bòbò mbabipange, mbimweke anu bu ne mbanange ciine aci.

<sup>83</sup> Mèmè nènzwàm̀bile ne, kùdì cintu kampanda cidìbo banyangakaje, ndiyiisha dya Evanjeeliyo wa Mukalenge Yesu Kilisto. Démons nyidì minuvuule bilàmbà ayi. Kacya kùkaadikù anu muntu umwepele mu Bible wàkapanda bilàmbà byèndè ne kubivuulaye, ùvwa mmuntu uvwa mukwàta kùdì démons. Ne yèyè awu ùdì ùlwa mu mmwenekelu wa mutekeci leelu ewu, byenze bu ne mmumanye kusòm̃ba ne bantu, byenze bu ne bìdì anu bîmpè, byenze bu ne kakwèna bwalu bubi to. “Kuulu kùdì kùtàm̀bakù kutalala; ne nebitambè kukupèèshakù citaleela wéwè muvuule bilàmbà.” Balume bèndakana eku ne eku mu mbànza, bavwàle bu bàdì kabayi bavwàle, ne bakaji bya mwomumwe. Mona's, nwáfiki mu mushindu wà ne kakücyèna kabidi kaneemu katámbe katùbo naaku bwa mbwa aku to,

muntu ne mukwèndè. Mbwalu kaayi abu? Mémè ncyèna nkeba bwa kunutapa ku myoyi to. Ndi nteeta anu bwa kunwambila ne ndikwaciibwa dya kùdì démons, kabidi nudi nuteeleja nyuma miseeswishi yìdì munkaci mwa kunwambila ne, “mbîmpe,” kadi pààcì ciikàlè mashimi.

<sup>84</sup> Lutete lwa blé nelupatulè anu blé. Wèwè mwikàlè mwena Kilisto, kwàkwenza aci to. Kwèna mwa kucyènza to. Kwèna anu mwa kucyènza to. Wèwè udi ne diitabuuja dya mamanya a mu mutu ne wamba ne: “Mwaneetu Branham, mémè ndi mwitabuuje Bible.” Nsòmbelu wèbè’s ùdì wàmba ne kwèna mwitabuuje. Amen. Nyuma miseeswishi yìlwishangana ne Dîyi dya Nzambi.

<sup>85</sup> Yèyè ùvwa mumanye pàvwàye mwimanyine, Miika awu. Ùvwa ne Dîyi dya Nzambi. Ùvwa muntu wa kàyikù mumanyike to. Muntu nansha umwe kàvwakù mumuswe to bwalu yèyè ùvwa wàmba Bulelela, nansha mùvwàbo bôbô baswè bayiishi aba amu.

<sup>86</sup> Mpindyewu, cikwabo cintu cidì cyenzèke. Mème ndi ngiitabuuja ne ngeela meeji ne muntu kanà yònsò ukaadiku mwenze dilabula ne Nzambi, mulume anyi mukaji, ùdikù anu ne cya kupeta kaadisaluka. Mémè ndi anu ngiitabuuja nanku. Neya bushuwa. Kadi nudi bamanye cidì bwalu anyi? Bôbô bǎngàcì disaluka bǎditéeki bu ne ki dibatiiza dya Nyuma Mwimpè. Bǎdi bènza anu mutooyi bûngì cyanààna, kadi kamùyi cintu nansha cimwe to. Ikàla ne nsòmbelu wa cijila anu mùdi ne nsòmbelu wa mutooyi amu, dîbà adi newikalè bîmpè. Masaluka neya bushuwa ne àdi anu bîmpè; “didìbidija dya mubidi didi ne mushinga kakese.” Kadi nyuma miseeswishi yìkaadi mikabwele mu kasumbu kàà bantu beena cijila, ne mibǎfikishe ku dikashàala beeyèmène anu pa ne “bwalu bǎdi mwa kwela mbila” anyi “bwalu bǎdi mwa kuja maja, bwalu bǎdi mwa kupeta masaluka.”

<sup>87</sup> Mukulumpe awu kuntwaku, mfumu wa bapofeta bònsò abu awu, bayiishi abu, ùvwa mutwishibwe anu menemene mùvwàye mubinge, mu mushindu wà ne wàkadyènzela nsengu yibidi ne kujaye wènda ùnyunguluka, ne wàkenza cimvundu citámbe bunene. Ùvwa mwa kusaka cilwilu cikwabo cya beena Suuliyà aci too ne pambelu pàà ditunga. Kadi’s cìvwa mmafi! Dîyi dya Nzambi divwa dyambe bishiilàngàne. Amen. Nwamonu’s, wèwè udi mwa kwikala ne disaluka dijaalàme, pawikalà ne cintu cya bushuwa cya mushindu mujaalàme cyènda cidilonda, disaluka dya mushindu mujaalàme diikàlè disàka diine disaluka dyebe adi.

<sup>88</sup> Davidi wàkajà maja kumpala kwa Mukalenge, ne mukajende wàkamuseka. Kadi Nzambi mu Dyulu wàkatàngija mèsù panshi, kwambaYe ne: “Davidi, wèwè udi muntu wa pa mwoyi Wànyi Mémè.” Kadi tubingilà twèndè tùvwa tujaalàme. Nsòmbelu wèndè ùvwa mujaalàme, paanyima pàà cyòci aci.

<sup>89</sup> Pa nanku, anu bwalu tudi mwa kwikala ne masaluka, aci kaciyena cyũmvwiya ne tudi basungidiibwe nansha. Bwalu tuyààya mu ekeleeziya, kî mbwena kwamba ne tudi basungidiibwe nansha. Kanwitabuujikù nyuma miseeswishi ayi to. Nyuma mulelela wa Nzambi, Dìyì dya Nzambi dilelela, didi Bulelela bwa Nzambi; didi Dimiinu dya Nzambi, neditwale Nzambi mu nsòmbelu webè; wikala wa difwànà dya Nzambi, wa bunsantu, wa cijila.

<sup>90</sup> Munkaci mwa bantu bààbũngì tudi tusangana ne mwaba wùdì masaluka, ne bikwabo, mùdì mùlwa tubwabwa ne dyamba dya maalu mabi a bakwabo, ne bintu bya dibenga kuneemeka Nzambi bya mishindu yònsò. Mwaneetu, aci's ng'acide wa soufre mu ekeleeziya. S'mbukole bwa démon. Nyuma wa balume ne bakaji bàdì bàbwelakanangana munkaci mwa bamwe ne bakwabo, ne bàteeta kusàka maalu, bàmba ne: "*Cikampanda* kî ncimpè to, ne *cikansanga* kî ncimpè to, ne *cikankenga* kî ncimpè to. Wèwè muswe kulondesha, misangu citeema pa dikumi anu muntu mwine udi uvwàndulula màyi awu, yèyè ngudi kàyì mujaalàme to. Amen. Nzambi ùtu mukine dibenga kupetangana munkaci mwa bàna bàà muntu. Ikàlà ne kaneemu, ikàlà wa cijila, nangà Nzambi, imana ku luseke Lwèndè. Ne paùdì mumanye ne nsòmbelu webè ùdì mu dipetangana ne Bible, mwikàle ne bukezùkè bwa mwoyi, bukezùkè bwa meeji, dinanga bwa mwaneenu, uteeta ne mwebe mwònsò bwa kuyiisha Bukalenge bwa Nzambi kumpala, ne wenza bintu abi, uvwàla bilàmbà mu mushindu mujaalàme, mwikàle ne nsòmbelu mujaalàme, uyiikila miyiiki mijaalàme, uya ku myaba mijaalàme, díbà adi udi mwa kwikala ne masaluka ònsò aùdì muswe kwikala naawu awu, ne bònsò nebàcìtàbùùjè.

<sup>91</sup> Yesu wàkamba ne: "Nudi mukele wa buloba. Mukele wòwò mucìmije ditwa dyawu, kubangila anu apu kawèna kabidi dikwacisha to, bàdì bàwìmansha pambelu ne bàwùdyatakaja ku makàsà kùdì bantu." Wèwè mwikàle anu mukele cyanààna, kabyena ne dikwacisha to. Kadi wèwè ne ditwà munda amu, ikàlà mutwe mukele nenku bàà pa buloba nebiikale ne nyoota. Ikàlà mutwe mukele, bòbò nebiikalè ne nyoota. Kaa, ekelekele!

<sup>92</sup> Nyuma miseeswishi yìya kumpala, démons midibwikile ciseba. Tàngilààyi, tudi mu dituku dya ndekeelu. Tudi ku cikondo cya nshiikidilu. Buloba bùkaadi pabwìpì ne kufika ku ndekeelu wabù, byenzè mùdì cyùjà cya cikùyila mwaba kampana cùkalà mwa kutaayika dimwe dya ku matuku aa ne tufina tùdì munda túsòtokamù. Cìkaadi cilwè ne bukooya bwa kacya. Kakwena bwanga bùdì mwa kucyòndopakù to. Bàkaadi babènge cilami cya—cya muntu ku disaamà. Bàkaadi babènge dyondopiibwa. Angata anu cyùjà ciikàle cijuuka mwaba awu, ne wèwè kùyì wangata bwanga bwa pènèsèliinà anyì cintu kampana bwa kucitùndula to, anyì cintu kampana, necitungunukè anu ne kuula too ne mwàtaayikàci.

<sup>93</sup> Ki cidi bàà pa buloba benzè. Mbabange, kî nkwanji kwenza ntanta mule to, bàatekèci mu maboko. Mbabangile pa mmwenenu munene menemene, nyuma ya mafi mibwele ne mibange kwambila bantu *bikampanda*, *bikansanga*, anyi *bikankenga*. Twètù kutapuluka mu mangumba nkama citeema ne bya mu njila mashiiłèshiiłàngàne, dyònsò diikàle ne mmwenenu mushiiłàngàne. Bàdi bàmba ne: “Twètu tudi twitabuuja *cikampanda*, kwajiki! Ki cyònsò citùdi twètù twitabuuja.” Kabeena mwa kulekelaku bwa Nyuma Mwimpe àbwelè to. Kabeena mwa kwikalaku ne budyànjididi to. Nzambi mmupete musumbà wa bantu bàvwà mwa kwela mbila, dîbà adi kukengelabi bwa bantu bònsò kwelabo mbila. Mbapete ndambu wa bàvwà mwa kwakula mu myakulu, dîbà adi kukengelabi bwa bantu bònsò kwikalabo bààkula mu myakulu. Mbalwe kupeta byònsò mushindu ewu, mu mushindu wa ne byàlu kushàala (cinyi?) kakùyi mpatà to bitampàkànàngàne ne nyuma miseeswishi, yiseeswisha bantu bwa kwenzabo masaluka aa pàdi Nzambi kàyimù to nansha kakese. Pashiishe bàpàtuka bàya kiikala ne nsòmbelu wa mushindu kanà wònsò udibò bàjinga kwikala nende awu, ne dîbà adi kucibiikila ne “mwena Kilisto.”

<sup>94</sup> Nenku bàà pa buloba bàsòmba ne bàtàngila, bàmba ne: “Ee, tangila kwàka! Mèmè’s ndi mwimpe anu mùdibo bòbò amu.”

<sup>95</sup> Anu mùmvwà ngamba diloolo adi bwa ngulube, bwa ngènzàmpèkààtù. Kwèna mwa kudyula . . . Ngènzàmpèkààtù udi ngènzàmpèkààtù. Kuteeci bwa kumulogolola nansha. Kuteeci bwa kumwambila *cikampanda*, *cikansanga*, anyi *cikankenga* to. Yèyè ùdi ngènzàmpèkààtù anu kwine kwònsò aku. Yèyè ngulube, anu kwine kwònsò aku. Kî mmumanye mukwaba mwa kwenza to. Yèyè ùya mu sèndemà, ne ùya mu dyalumingu, ne ùya mu manayi a ndundu, ne wènza bintu byònsò ebi, yèyè ngènzàmpèkààtù, anu kwine kwònsò aku. Wendè ngiikadilù ùdi bu wa ngulube. Ngulube wa kale awu ùdi ùfunyika dyùlù mu mushiki wà tùmvi twa nyama ne ùdya ntete yònsò yidimu ayi, ne bikwabo byònsò; ee, aci, yèyè’s nngulube. Kwèna mwa kumudyula to. Yèyè ngulube. Kî mùdibi nanku ne bangènzàmpèkààtù. Kadì paùdi uya udibiikila mùdi mwena Kilisto, kadì ukafunyikamù dyùlù dyebe pamwe nende, dîbà adi kùcyèna kabidi mwimpe mumutàmbe yèyè to, kadì, wèwè ngudi mutàmbe bubu. Patuka muntwamu. Lekelela maalu a pa buloba àye. Àlekèlè àye. Shiila Nzambi. Àlekèlè àye.

<sup>96</sup> Udi ulekelela bìshi? Bantu bààbungì bàdi bàdikonka leelu ewu, bàmba ne: “Ee, Mwaneetu Branham, udi ulekelela bìshi’s?” Ndi mumanye ne mukàadi bumvùumvwe tèdòlji bùngì cyanàana pa bwalu abu ne, “kulekelela.” Bantu bààbùngì bàdi bàsubakana anu cyanàana, bàteeta bwa kulekelela. Bantu bààbùngì bàdi bàlwa bàmba ne: “Mvwa muswe kwenza kujila kwa byakudyà kwa matuku makumi anaayi bwa ngaamònakù mwa kwenza

cintu kampanda.” Kabyena bikukèngela kujila kwa byàkudyà kwa matuku makumi anaayi to. Bidi bikèngela bwa wèwè kulekelela maalu a pa buloba ne bintu byònsò bya baadémons ebi biye, ne kwangata Dìyì dya Nzambi mu mwoyi wèbè. Bikèngela ùlongeshiibwè mwa kwenza nanku. Kwèna ucyènza mu kutupika kuya muulu kwalukila to, anyi kwèna ucyènza mu kujila kwa byàkudyà kwa matuku makumi anaayi to. Udi ucyènza ne mwoyi mulekelela Nzambi wa Bukole bwònsò.

<sup>97</sup> Mùdì mwânà mukese. Mwva mumone mwanàanyi mukese udi paanyima pààpa wàwa, mamwèndè ùteeta bwa kumuvwadika kankòletè kèndè kakese, mu dinda emu. Yèyè uvwa ùkèba kwela diboko dyèndè dikese adi mu diboko dya kankòletè. Kàvwa ne mushindu wa kwelamù diboko to; kî mmumanye mwa kudyèla to. Bikèngela ùludikè diboko dyèndè dikese adi. Yèyè mmuswe bwa kubwejamu diboko, kadi ùdi ùlwangana ne ùdibwejila anu ku luseke. Kàyì ùpetakù kùdì diboko dya kankòletè aku to. Yèyè mmumanye ne kî mmudyèlè mu diboko adi to.

<sup>98</sup> Ne wèwè pèèbè udi mumanye ne kwèna bìmpè kumpala kwa Nzambi to, paùcidì anu wàmba maalu mabi a bantu, ushima, wenza bintu byònsò abi apu. Kwèna mwa kwikala bìmpè kumpala kwa Nzambi to, nansha wèwè mwikàle wa mu ekeleeziya búngì kaayì, too ne paafika musuuka wèbè ku dikudimuna dya mucima. Mwaneetu, aci ncya cyena-kale, kadi necìikalè mwa kukwata kapyà too ne mu ndondo wa musuuka wèbè ne kwelamù nsupù. Cya bushuwa!

<sup>99</sup> Ùteeta bwa kwela diboko, bìdi bikèngela bwa kwikalaye ne muntu ùmuludikamù, mushindu wà kwelamù diboko. Dìbà adi pàdiye ùbweja diboko mu dya kankòletè kèndè kakese aku, ùdi ùmanya ne byàkànyì.

<sup>100</sup> Ki mùdìbi nanku ne mwena Kilisto yònsò mulediibwe cyakabidi. Pàdiye ubwela cya bushuwa munda mwa Nzambi, ùdi ùkenketa nsòmbelu wèndè ku Dìyì dya Nzambi ne ùdi ùmanya ne mmuditèèke mu bulongame bwa kantu ne kantu kààDì. Yèyè ùdi ne mwoyi mule, musàngèelu, ditùùja, bupole, bukole, diitabuuja, dinanga, disanka, ditalala. Kèna ùtànkaakajiiibwa eku ne eku bu mbù muvwàndulula to. Kèna ùtácisha meeji bwa kantu kakese kònsò to. Kèna ùtùpika ùya *apa* ne *pààpa*, bu cijìkù cya mulangi pa mbù mutuuta kùdì cipeepele to. Mmushindame. Mwoyi wèndè mmukezuke. Meeji èndè mmakezuke. Tulumbilà twèndè ntukezuke. Dyèndè disungula ndijaalàme. Ne yèyè mmumanye ne ùdi mu njila wa Dìyì dya Nzambi. Inferno mujimà kèna mwa kumunyungishakù yèyè to. Yèyè mmuteèka mu njila kùdì Dìyì dya Nzambi. Ùdi ne dinanga dya Nzambi, bukezuke mu mwoyi wèndè, bwa muntu mulume ne muntu mukaji yònsò. Ùdi ne. . . Ùdi ùdikànda ku maalu a pa buloba, ówò mmafwe bwèndè yèyè; kî mmuàswekù kabidi to. Mona’s, kwèna mufwànyineku kufikisha nsongàakàjì mùle tente ne Nyuma Mwimpè ku divwàla



dya bilàmbà bya mmwenekelu mubi abi ne kupatuka naabi kwàka to nansha bwa cinyi. To, mukalenge.

<sup>101</sup> Mpindyewu, kabyènakù ne mushinga bwa wêwè kuya kamwambila ne mmupiile to, bwalu yéyè kààkukwitabuujakù to, bwalu ki cyònsò cidiye mumanye. Ki dyèndè disanka ndyòdi adi. Mukaji ùdi ùvwàla tuntu atu; bàdi bàpàtuka, ku diloolo, anu pàdi bantu balume bààlukila kumbelu apu; bàdi bàlwa anu bwa kukosa mashinda mu lupangu, bwa . . . Ki wêwè kungambila ne mbîmpè abi's? Wêwè mukaji, ncyèna ne meeji a kwamba ne wêwè udi—udi mubi to. Ncyèna ne meeji a kwamba ne wêwè udi wa ngiikàdilu wa masandi to. Kadi kwèna ufika ku dimanya, mwaneetu wa bakaji, ne nyuma wa bukooya mmukubakule to. Udi mufwànyine kucyènta bwa cinyi? Wêwè's udikù ne meeji mu ôwò bwa kumanya ne kabyena bitàmba kufila citaleela. S'bidì bitàmba kufila luuya. Kùdi nyuma wa bukooya.

<sup>102</sup> Wêwè udi wamba ne: “Mémè? Mémè, s'mvwa muye mu ekeleeziya!” Nebùkàndànèèsà's ùvwa muntu munene. Kadi, anu bwalu wàkadibàndisha, Nzambi's wàkamupà nyuma wa ngombe, ne kumushiya ùdya bisoosa munda mwa bidimu mwandamutekete, ne nzadi yèndè ya ku minu kuleepayi bu ya bamwe bàà ku bakaji bàà muneemu emu aba. S'ncyà bushuwa. Ki kukwaciibwaye kùdi démons.

<sup>103</sup> Muntu kampana wàkawkàciibwa kùdi démons ne wàkavùùla bilàmbà. Kabàvwakù mwa kumuvwàdika bilàmbà to. Nudi bumvwe cìndì njinga kwamba aci anyi? Nnyuma miseeswishi ayi.

<sup>104</sup> Ekeleeziya wenù ùdi wìtaba ciine aci. Muiishi wenù ùdi ùciina bwa kwamba díyì, ùciina ne nkwèpì kunwàlwà kanùciyi kabidi numufuta byadiikumi byenu abi. S'ki kabingilà nkòkò aku. Ki lutatu ndwòlù alu. Ekelekele, Nzambi wanyì! Mmunyì muwàyiishà musumbà wà tubangu-nyuunyi, paùdi kùyi mutùkùdimwishe mucima ne mutùvwijè tujaalàme kumpala kwa Nzambi's, twamb'eku twamb'eku? Twòtù's netùkafunyike díbà dyònsò mínù yàtù ayi mu bintu bifwe. Cìdì cìnùkèngela ndishiyiibwa dya munda mutupu, ne ditabuluja dya cyena-kale dya ditangalaka dyùmuka ku mwelelu wà mbù díya too ne ku mmwelelu mukwabo, ne dífikisha balume ne bakaji ku diikala bajaalàme kumpala kwa Nzambi. Lekelela, bintu bya pa buloba! Lekelela, nyiishilù wa fwèfwèfwè wa tuubintu twa tukese katùyi mushinga awu. Amen. Yishà Evanjeeliyo. Ki mùdi Nzambi mwambe. “Wêwè munange maalù a pa buloba, anyì bintu bya pa buloba, dìnanga dya Taatù kadyena nansha munda mwebe to.”

<sup>105</sup> Bantu bàdi mwa kutupika bàya muulu bààlukila, ne bèèla mbila bufuku bujimà, ne bààkula mu myakulu byenzè bu bàdi bàpòngolola nkunde pa ciseba cya ngombe cyùme; dya bàpatuka pambelu, pàdibu bùcya mu dinda anyì, biikàle ne

cijì cya bafwànyine kulwangana ne scie wa ùnyùnguluka, kuya buludì ne kwamba cintu kampanda mu ekeleeziya cidi mwa kufikisha ekeleeziya mujimà ku dipanduluka. Kì ncingà cintu to anu nyuma miseeswishi, ya baadémons! Mbîmpè kwalukila ku Dìyì, kùdì Nzambi mwikàle bukezuke, wa cijila. Amen. Ncya bushuwa. Nyuma miseeswishi yilwishangana ne Dìyì dya Nzambi!

<sup>106</sup> Kùvwa muntu mulume kaaba aka, anu abidi àdì panshi aa, ùvwa ne mukaji mukese. . . Beena Katolike bàdì naabo dikumi ne babidi kuntu kwàka. Mu cikondo cyèndè cya kàciyi ùya ku mashi aci, bipàtukila mu byanza byèndè anu ne mu mpala. Bu muiishi mwîmpè mûle ne Nyuma Mwîmpè. . . ki mûmvwà ngeela meeji. Muntu awu ùvwa ne mulangi wà biine bintu abi, bìvwà bipàtukà mu byanza bya mukaji awu abi, wènda wèndakana naabi ùbilaaba bantu. Yoyöyò! Luse wè! S'ncya mufwilakanyi ne Kilisto's! Bwànyì mèmè nansha mashi awu àmupàtukila mu dyùlù anyì mu mutu, anyì nì mpenyì, mwaneetu, kakwènakù mashi àngatà kaaba kàà Yesu Kilisto Mwànà wa Nzambi to. Awu ki Mashi amwepele àndiku mèmè mumanye. Mukaji awu mmufwànyine kwikala ne maanyi àzòlolokela mu cyanza cimwe, ne mvinyo mu cyanza cikwabo, kadi, bu wèwè mwa kukwata naabi mudimu mu mmwenekelu wa ntendeleelu kanà yònsò, cidi ndyabulu. Pa kumona mushindu mwine wùdì bayiishi bàseeswishiibwa ku bintàkanyì bya mushindu awu's wè!

<sup>107</sup> Cidì citùkèngelà, nkwalukila ku Mukanda-Mulombodi, kwalukila ku Dìyì dya Nzambi! Eci ki Dìyì dya Nzambi, Bible mubeneshiibwe wa kale ewu. Wèwè udi wamba ne: "Ee, mèmè ndi nciina ne nkwèpì kùngààlwà kushààla aci, Mwaneetu Branham. Ndi nciina ne nkwèpì kùngààlwà kujimija disanka dyànyì." Mbwalu kaayi ebu's? Kwèna mumanye cidi disanka to.

<sup>108</sup> Ntu ngamba ne ncyèna mpiisha mukwaciki wa maala bwa dipatuka kuya kakwacika maala to. Yèyè's ùdì ne majiyà mapite. Kì mmumanye to. Ùdì ùjuuka, mu dinda kampanda, ùlwa kabungame, ne mutu ùmusaama. Ùpàtuka ùya kakeba milangi ya bière yibidi anyì yisatu, ne ùpàtuka ùya kakeba wiskì, ne bintàkanyì byònsò bya mushindu awu abi.

Kanù kaa mfwankà kadi kasòmba mwaba awu kànwa mfwankà, ne kàpàtwila mîshì mu dyùlù kenze bu kàwulù kàà cyambula. Ki cyònsò ncyaci. Mèmè ncyèna mmudyulakù to; ki dyèndè disanka dyònsò dìdìye mumanye ndyadì. Ki cyèndè cyònsò cidiye mumanye's. Yèyè's nngulube, ku ngiikàdilù.

<sup>109</sup> Bundu bwebe wèwè udi ujikula wamba mùdì mwena Kilisto kadi mweyemene bintu bu nanku bwa kupeta ndisanka, pàdì Evanjeeliyo wa Nyuma Mwîmpè kàyi cingà cintu to anu nzubu munènaanènààle udi utùma nzembu ya disanka. Evanjeeliyo wa Nyuma Mwîmpè ùdì dikwacika dipwàngàne bwa muntu

yônsò udi mushààle kabungame. Wêwè neúnwe ndambu wa Evanjeeliyo wa Yesu Kilisto, újibwè tente ne Nyuma Mwîmpè, udi ushààla mukwacike too ne muwàshiyanganà ne buloba ebu, amen, disanka dya kadiyi kwamba ne dyûle tente ne butumbi. Mùdi dikwacika dya díbà dyónsò. Ndikwacika dya díbà dyónsò, mukwacike muunya ne bufuku! Amen. Ki Díyì dya Nzambi ndyadi.

<sup>110</sup> Ekeleeziya ùdi ùlwa, úteeka yêyè cingà cintu. Bìkèngela bwa kwenzabo kaaféte kakese mùdibo bônso bàya ku lusenga lwa ku kaalà kwa màyi, bwa kupicishabo kapeepà. Didikúngwija dya bènza fête wa manayi a twarta, bwa bwobumwe. Ncya bushuwa's. Bàja maja, pámwäpa, kumbelu kwa umwe wa ku baamambälà, yimwè misangu mu nzubu wa mwinshi mwa bulaba wa ku ekeleeziya. Maja, munkaci mwa kubyàngata, bàtèeta bwa kupetakù cintu kampanda cidì mwa kubasankisha. Mbwalu kaayi ebu? Bàdi mmusùmbà munene wà ngulube's, nansha bishi. S'ngulube's, anu kwine kwónsò aku. Bôbò mwa kubwelakù mu dipetangana ne Kilisto, s'mbafwányine kupeta disanka búngidì, bintu abi's bifwányine kwikala bifwe kutamba mundankulu, bwàbò bôbò. Evanjeeliyo's, bakwàcike Nyuma, disanka dya kadiyi kwamba ne dyûle tente ne butumbi.

<sup>111</sup> Kanùpiishikù ngènzàmpèkààtù to; muumvwilaayi luse. Mulekelaayi àtungunukè ne kunwa cishibà cyèndè cya mfwankà aci, mulekelaayi anwe maala èndè makole awu, mulekelaayi ènzè fête wendè wa manayi a twarta awu. Ki wèndè pèndè mulòwù ngwòwò awu. Kanùmudyulù to. Udi wàlukila kumbelu ne bikwabo byónsò, mucyoke ne muzengèle, cidìye muswe mmulòwù kampanda. Cintu cyùdi wèwè ne cya kwenza nkwikala ne nsòmbelu wa difwana dya Nzambi dya menemene bwa wamòna mwa kumujaadikila ne Evanjeeliyo ùdi ne cidì citàmbe byòbi abi misangu binunu dikumi, cidìye mumulamine. [Katùpà kàà mukaba wa mèyi munda mutupu—Muf.] Kadi yêyè mufwe mu ngiikàdilù awu, s'neàye mu iferno, mu maala èndè makole awu. Ki dikwacika didì naadi dyabulu ndyòdi adi. Yêyè mufwe, munkaci mwa kukoka cishibà cya mfwankà cya kale aci, Nzambi ngudi Mulumbulwishi wendè. Yêyè mufwe, mwikàle ùpàtuka ùya, mu dijà dya maja, ne mu diya dya eku ne eku muvwàle bilàmbà bya mmwenekelu wa masandi abi, Nzambi ngudi Mulumbulwishi wendè.

<sup>112</sup> Kadi kùdi cintu cimwepele, wêwè mufwe mu dilaabiibwa dya Bukole bwa Nyuma Mwîmpè, mushindu wàkafwà Stefano pààkatàngilàye muulu mu mpala wa Nzambi, kwambaye ne: “Ndi mmona Maulu munzulula, ne Yesu mwimane ku diboko dya balume,” wêwè's udi mu njila mutàngile ku Dyulu, anu mùdi kandìndi kàya katàngile ku diswa dyàkù amu. Amen.

<sup>113</sup> Nyuma miseeswishi yilwishangana ne Díyì dya Nzambi! Lekelela, lekela biye. “Mwa kucyenza mmunyi's, Mwaneetu Branham?” Bilekèlè anu biye cyanàànà. Ki cyónsò cidì cikèngela

bwa wêwè kwenza ncyôci aci. Angata Dîyì dya Nzambi. Kùteeci bwa kudikwatakajila cintu nansha cimwe to. Kùyi katwa binù ku cyoshelu kadi kutuutakù bintu to, wela mbila ne: “Nzambi, mpèèshè Nyuma Mwímpè! Mukalenge, mpèèshè Nyuma Mwímpè!” to. Yèyè kààkulwakù to, ku dituuta dyebe dya bintu ku cyoshelu adi. Aci kacycènakù ne dikwacisha to. To. Awu kî mmushindu wùdiYe ùlwa nansha. Bwalu bùdi, kuMukwacila ku Dîyì Dyèndè!

114 Tàngilàayi Peetèlò. Peetèlò ùvwa mu lutatu, bîmwèka anu bu ne ùvwa wa lufu. Ki kumonaye Mukalenge ùlwa, wènda wèndela pa mâyi. Ki yèyè kwamba ne: “Mukalenge, awu nî ng’Wèwè, tuma dîyì bwa ndwe.”

Mukalenge kwambaYe ne: “Lwâku.”

115 Mpindyewu Peetèlò wàkamba ne: “Mpindyewu anjì indila kakese, Mukalenge, ngǎnjì ngènzè kujila kwa byàkudyà kwa matuku makumi anaayi, bwa kumona ní ndi mwa kwendela pa mâyi apu, anyì ncyèna mwa kwendelapu. Éyi Mukalenge, ngǎnjì mpetè Nyuma búngì bukùmbàne pambidi pàanyi, bwa ngaamona mwa kuja maja mu Nyuma ne kwakula mu myakulu, mu bwâtù emu, pashiishe nêngiikalè mwa kupatukamu” anyì? To, mukalenge! Yèyè wàkawkàcila Nzambi ku Dîyì Dyèndè, ùlekelela ne ùlekelela biya. Nzambi wàkamufikisha too ne ku ndekeelu.

116 Kadi bu ne Nzambi wàkatwìlangana ne Mòsà, ne kwambaYe ne: “Mòsà, nda mu Ejiipitu mwàmwa, wàmбилè Pàlò ne: ‘Lekela bantu Bàanyi bàye’”? Kadi bu ne Mòsà wàkamba ne: “Ngǎnjì ngènzè, dyambedi, kujila kwa byàkudyà kwa matuku makumi anaayi, bwa mmonebi ní ndi ne diitabuujà dikùmbàne bwa kuKutumikila, Nzambi. Mpèèshàku cintu kampanda, cintu kanà cyònsò, Mukalenge. Indila nKwambileku cintu kampanda, ngǎnjì mmonebi dyambedi, ní ndi mbwela mu Nyuma”? Mòsà kààkeelakù nkonko to, wàkawkàcila Nzambi anu ku Dîyì Dyèndè, nenku nyèyè uyààya wàwa. Mushindu awu ki wùdibi bikèngela bwa wèwè kucycènza, kukwàcila Nzambi ku Dîyì Dyèndè. Dìbà adi udi umanya ne newikalè mukumbane bwa kucycènza. Yèyè kààkindila too ne pàvwa cintu kampanda cikwabo mwa kwenzeka to, wàkaya anu cyanàànà ne wàkacycènza.

117 Kadi bu ne Eliyà, pàakatùùlukàye ku Mukuna wà Kaamèèlè apu, mumane kushààlakù ntanta mule? Nenku kutwilanganaye ne mukaji wa mu lufwilà mukwate ne bya luse. Mukaji awu ùvwa... ùvwa mwenyi, wa bàà Bisàmbà bya bendè. Nenku pàakatwìlanganàye ne mukaji awu kuntwaku, yèyè ùvwa munkaci mwa kwangula nkunyi, mu bulà amu. Nenku Nzambi ùvwa mumwambile ne: “Ndà kwa mukaji wa mu lufwilà awu.” Mwaba kaayi bwa muiyishi kuyaye’s wè!

118 Ki yêyè udi upweka mutangile kwa mukaji wa mu lufwilà awu ewu. Nenku mukaji awu, ùvwa ne tukunyi tubidi. Kwambaye ne: “Udi wenza cinyi?”

119 Awu kwambaye ne: “Ndi ngangulakù tukunyi. Ndi ne tuubukula ndambu tukumbàne bwa kwenza anu tuumâmpà tubidi. Ki twônso tùdiku tunshààdile. Kùkaadi bidimu bisatu bitùdi katùyikù bapete mvula wetù ewu to.” Ki yêyè ne: “Nenku nêngenzè tuumâmpà twa bukula bwa nsèke etu. Nenku mêmè ne mwanàanyi wa balume netùtùdyè, ne netufwe.”

120 Kwambaye ne: “Anjì ngenzèlè mêmè kamwe, dyambedi!” Aleluuyah! Kaa, ndi mumanye ne mêmè ndi mupâle ndambu, kadi ndi ku luseke lwa Mukalenge, nansha bishi. Kwambaye ne: “Anjì ngenzèlè mêmè kamwe, dyambedi. Bwalu, EMU MMÛDI MUKALENGE WÀMBA.” S’ki bwalu mbwôbù abu.

121 Ncinyi aci? “Anjì kebaayi dyambedi Bukalenge bwa Nzambi, ne bwakane Bwendè.” Kì m’Bukalenge bwa Nzambi ne “ndambu wa mutooyi” to, kî m’Bukalenge bwa Nzambi ne “ndambu wa disaluka” to, kî m’Bukalenge bwa Nzambi ne “ndambu wa *cikampanda* anyi *cikansanga*” to. Kadi: “Nzambi, ne bwakane Bwendè, ne bintu bikwabo byônso ebi nebanusakidilebi.” Anjì tèeka!

122 Mpindyewu, mukaji wa mu lufwilà awu kuteelejaye cyôci aci. “Diitabuuja didi difuma ku diteeleja, diteeleja dya Dîyi.” Kwambaye ne: “Aci’s n’Dîyi dya Mukalenge, bwalu wàwa mmulume wa cijila wa Nzambi. Mmuprofeta wa Nzambi, ne ndi mumanye ne m’Bulelela. Ne aci n’Dîyi dya Nzambi.”

123 Mpindyewu, yêyè kàakaya lubilu dînsambù bwa kakonka beena mutumba mwa kucyenza to. Kàvwa muswe bwa kuya kaabanyangana dyèndè...ne kwambila beena mutumba, kwamba ne: “Mpindyewu, nudi nwela pèenu meeji bishi? Muiishi awu’s nyewu ùdi kwanyi eku, wamba *bikampanda*. Susie, udi pèèbè wela meeji bishi bwa *cikampanda* eci?”

124 Yêyè wàkabwela, kubangaye kulekelelangana bintu. Kulekelaye bwa biye. Kulekelelaye bìvwàye naabi bwa biye, bwa wàmòna mwa kubipeta bipite apu. Ki cidi cìkèngela bwa bàà pa buloba lelu ewu, ndilekelela dîmpè dya cyena-kale dya binùdi naabi. Aleluuyah! Yêyè wàkapòngolola, bwa wàmòna mwa kuujiibwa. Wàkapòngolola mafuta ónsò àvwàye naawu, ne mafuta ónsò àvwàye naawu ne bukula bwónso bìvwàye naabu, kùdi muiishi awu, kùdi Bukalenge bwa Nzambi. Nenku pàakabipòngololàye byónso muntwamu, ki Nzambi kutuulukaYe, kuujaYe tente cipanza cya bukula, kuujaYe tente kàsù kàà mafuta. Kubilekelenganaye cyakabidi, mu dilòngà dya muiishi awu. Ki kulwaCi, kubyuja cyakabidi. Kubilekelenganaye. Musangu wónso wùvwàye ùbikelelangana, Yêyè ùvwa ùbyuja tente.

125 Ndi ngamba, leelu ewu ne, muntu yêyè mulekelelangane lukutukutu lwònsò lwà macimbu elu, ne ditentula dya bwena Kilisto, ne mulekelele bwa Nyuma Mwîmpè àngatè kaaba Kèndè, nekùbangè ditabuluja mu disangu dya Mùsèèsù wà Mwandamukulu ne wà Penn dyàtangalakà mu ditunga dijimà. Lekelaayi macimbu awu. Alukilaayi ku Dìyì dya Nzambi. Lekelelanganaayi bintu, bwa nwamona mwa kuujibwa tente. Lekelaayi biye, nenku Nzambi neabilekelele bilwa. Wèwè icikijà, ne Nzambi neújè. Tuubintu twònsò twa tukese katuyi ne mushinga atu, twa ne: “Bikèngela wènzè *cikampanda*, ne bikèngela wènzè *cikansanga*; ne bivwa bikèngela bwa wènzè *cikansanga* ne bivwa bikèngela bwa wènzè *cikankenga*” atu. Ubipwè mwoyi! Bilekèlèlè ùbyùmùshè mu musuuka wèbè!

126 Amba ne: “Nzambi, enzaku ne, kubangila ku leelu... mujimà ewu, ngiikalè mèmè yònsò Webè. Mukalenge, nyewu ndwa ne mwoyi mucibuluke. Ndi ndwa ne nyuma munyongàme. Ndi muKunange. Wèwè’s udi mumanye ne ndi muKunange. Ne ndi muswe kupwa mwoyi dikùtakana dyònsò edi dya kujila kwa byakudyà kwa matuku makumi anaayi bwa ne ní ngaamonaku mwa kutàmba kuseemena pabwìpi ne Nzambi, ne byònsò *bikampanda*, *bikansanga*, *bikankenga*, macimbu ònsò aa.”

127 Bilekèlèlè! Kakwena cintu nansha cimwe mu Dìyì cidi cikwambila bwa kwenza kujila kwa byakudyà kwa matuku makumi anaayi to. Nansha cimwe. Kakwena cintu nansha cimwe mu Dìyì cidi cikwambila bwa kwenza kujila kwa byakudyà to, ambà anu Nzambi mukwambileci. Wèwè mujile byakudyà, kwakumvwa nzala yikusùma to, ne kwakwenza biine bintu byònsò ebi to. Paùdi munkaci mwa kujila byakudyà apu, mwaneetu, newikalè ne disanka ne musàngelwe díbà dyònsò. Yèyè mmwambe ne: “Kanumweneki kumpala kwa bantu mùtù beena lubombo bènza, ne kwisù bu kùdì kwàmba bwalu, kubungàme amu to. ‘Ndi munkaci mwa kwenza kujila kwa byakudyà kwa matuku makumi anaayi. Mènù àànyi a divwàla awu kaàcyèna ànkùmbana kabidi to. Ndi mujimije kílô dikumi ne yisatu ne citùpà, ne bàvwa bangambile ne nèngiikalè ne mmwenekelu mutàmbe bwîmpè piikalà cijila eci cijikè.” Kaa, macimbu’s wè! Ayi’s nnyuma miseeswishi ya dyabulu.

128 Uya ku cyoshelu, wamba ne: “butumbi, butumbi, butumbi” too ne mùdì ufika kuciyyikù kabidi mwa kwamba cikwabo cintu to, ne kwamba ne: “Bikèngela wàkulè mu myakulu kumpala kwa kupeta Nyuma Mwîmpè.” Macimbu’s wè! Bìcikijè!

129 Umushaayi abi mu ndongolwelu wenù nulwe ku Dìyì dya Nzambi! Yèyè mmwambe ne: “Nyingalalaayi, muntu ne muntu wa kunùdì, nubatiijibwe mu Dìnà dya Yesu Kilisto bwa dilekelediibwa dya mpekaatu yenu, nenku nenupete kupà kwa Nyuma Mwîmpè.” Nzambi Yèyè kàyi mushààle mukwate ku Dìyì Dyèndè to, Yèyè kèna Nzambi to. Amen. Bìcikijè. Ujìbwà tente. Amen. Yoyóyò! Mèmè ndi munange aci. Ki Dìyì Dyèndè ndyòdi

adi. Ki mùdi Nzambi mwambe. Ncya bushuwa. Ne pàdi Nzambi mucyàmbè, Nzambi ki watàngila bwalu abu. Eyo. Didilongolola dyônsò dyûdi wenza, diya dyônsò dya mu ekeleeziya dyûdi mwa kwenza adi. . .

<sup>130</sup> Bidi anu mùdi ku midimu ya dyenza dya màkaadikà kùdìbo bàkwatakaja mushiki mujimà wà màkaadikà màshàndwishì eku, anyì, musumbà munene wa màkaadikà a beena lwendu. Kale wàwa mvwa ngenzakù mudimu. Nenku bàdi bàngata ne bènza màkaadikà awu ne bikwabo byônsò, ne bàlamikakù mabaya makole, mabaya a lusungàku nseke yônsò aku, ne byônsò bya bilenga abi, bàâtèeka pa njanja apu, kadi's civwa cifwe anu butubutu. Ki mashinyi awu matèeka mwaba awu, kamùyì luuyà to. Masòmbè anu mwaba awu's.

<sup>131</sup> Cidì cìcìkèngelà leelu nndambu wa mudilu mu cyesu cya disàbishila màyì. Cidì cìcìkèngelà leelu nndambu wa luuyà. Cidì cìcìkèngelà leelu, ekeleeziya, nkusàbishiihwa; cintu cidì citàmba kapyà cidìku bwa kusàbisha mpekaatu kuumumusha mu nsòmbelu webè, ndinanga. Kadi panùdi kanùyì mwa kunangangana muntu ne mukwèndè, mmunyi munwànangà Nzambi Unùdi kanùyì bamòne? Dinanga didi disokoka musumbà mujimà wa mpekaatu. Bwelàayi mu dinanga ne Nzambi, dìbà adi nenunangane muntu ne mukwèndè, dìbà adi nenunange ekeleeziya, nenunange Bwalu bwine, nenunange cyônsò cidì ne difwànà dya Nzambi, ne nenuseemene kule ne bintu bya pa buloba.

<sup>132</sup> Nyuma miseeswishi yèndakana eku ne eku yàmbila bantu *bikampanda*, *bikansanga*, anyì *bikankenga* ne: “Bidi bikèngela bènzè *cikampanda*. Bidi bikèngela bènzè *cikansanga*.” Mbwalu mangumba mmajuuke, ne bôbò mbapete kaadibuulula kakese kàdìbo bàmba ne: “Ee, mpindyewu, mèmè ndi ngiitabuuja ne muntu. . . Ndi ngiitabuuja ne kùdi cintu bu kwela kwa mbila mu Bible.” Aci ncya bushuwa. Mbulelela. Bôbò kwenzelapu dingumba ne: “Paùdi wela mbila, wàMupeci.” Kadi kwèna muMupete to.

<sup>133</sup> Mukwabo ùjuuka, kwamba ne: “Kwakula kwa mu myakulu.” Ncya bushuwa. Aci's cidì mu Bible. “Ee, paùdi wakula mu myakulu, udi Nende.” Kadi bààbùngì bàà kùdìbo bààkaakula mu myakulu, kadi kabàvwa Nende to. Nwamonu anyi? Awu kì n'Yèye to. To, mukalenge.

Bààbùngì bàà kùdìbo bààkamba ne: “Ee, bikèngela twàmbè biprofeta.”

<sup>134</sup> Tàngilàayi baprofeta aba ne nsèngù ku mitu, bàtùpika bàya muulu bààlukila ne bàmba biprofeta. Miikà kwambaye ne: “Nudi nushima bônso, muntu ne muntu.” Amen. Cya bushuwa. Nzambi kàtu ùlwa mushindu awu to. Nzambi ùtu ùlwa kùdi mwoyi wà meeji matooke wùdi wùlwa ne nyuma munyongàme, mucibuluke. “Ewu udi upatuka, wènda ùyamina mamiinu

ne binsonji, kakùyi mpatà to yèyè neààlukilè wènda ùsànkà, mwambule bimpampa bya mushinga mukole bya blé.” Amen. Ùmwè aci bìmpè, mulunda wanyì.

<sup>135</sup> Midimu ya baadémons búngi cyanààna, démons miikàle yìkwàta mudimu mu misuuka ya bantu! Tàngilàayi numone mwaba wùdici cìkwàmina mamuma ààci. Tàngilàayi numone ne nnsòmbelu wa mushindu kaayi udi nende muntu awu. Monaayi mushindu wùdiye wènda maalu, tàngilàayi numone mushindu wùdiye wènda, monaayi ne tubingilà twèndè tùdi cinyi. Kabyena anu mwa kwenzeka to. . . Ne bu mèmè mwa kunwambila ne: “Mushindu wumwepele. . . Ki màshinyi ngòwò aa miimanyika ònsò mu mulongo kaaba aka. Dyulu didi mu Charlestown. Kwèna mwa kuyakù lwà makàsà to. Mushindu wumwepele wùdi mwa kuyakù, mmu kashinyi. Ne muntu yònsò udi uya dyàmwàmwà dya mukàlù ùdi ne cya kutwala litres makumi abidi ya kàsòloonyi.” Ki kashinyi kèndè nkòkò aka, kadi yèyè kàyi ne kàsòloonyi to kèna mwa kukèndesha to. Ee, ki mushindu menemene mupwàngàne ngwòwò awu, wùdibi mu Dyulu. Wèwè mufwe kùyi ne Nzambi to, nsòmbelu ùvwà nende nansha mwikàle wa bishi ne tushinyi tûkaadìku mukwatakaje nansha twikàle búngi kaayi, dinanga dya Nzambi dyòdi kadiyimù bwa kukukoka kukubweja mu Bukalenge bwa Nzambi to, udi mujimine.

<sup>136</sup> Kùdi lusongo lukàji ne lusongo lulùme. Nzembu yìdi yìpìcilà kaaba aka nansha miikàle mikàji ya bishi, yòyi kayiyi ne nshinga wa mu buloba to, kayààkuteemakù to. Ncya bushuwa. Bìkèngela wikalè mwelesha miji, mujaamija mu dinanga dya Nzambi. Kaa, mwaneetu! Twangajà lusongo lulùme ne lusongo lukàji alu, neupete Bukènkè, Bukènkè bwa Evanjeeliyo mwimpè wa cyenakale awu. Enza bwa Bùtàngalakè kuumukila anu ku mwelelu wa màyi too ne mwelelu mukwabo. KwàdyàkuBùpetakù kakùyi cyòci aci to. Dinyukuka ne ditupika dyùdi mwa kwenza ne lusongo lulùme nansha diikàle dya bishi, bìdi bìkèngela wikalè ne nshinga wa mu buloba bwa kuteemesha Bukènkè. Amen.

<sup>137</sup> Nukàadikù bamone anyi? Udi utèeka nshinga wa mu buloba kaaba aka pa eci, ne kantu ne kantu kònsò kàdi kààlukila buludi kàpweka kaaba aka kàkabwela mu nsangilu wa nshinga wa mu buloba, kàpweka buludi too ne mu buloba. Nenu musangu wònsò wùdiku muntu wèleshiibwa miji ne ùjaamijiibwa mu Dìyi dya Nzambi, cìdi cìmwelesha miji ne cìmujaamija mu Kalvariyo, mwàmwa, mùvwà lwongò, dikunji dya ciswikidi dya Nzambi ditwadiibwekù, bwa kuteemesha Bukènkè bwa Evanjeeliyo. Amen.

<sup>138</sup> Nudi bamanye cìdi lutatu anyi? Bantu bàdi mu nzubu minene menemene ya bitalu ya mashika ya maalu a kwìsùkwìsù eyi, yìdicinkila mùdiyi yìyiisha Evanjeeliyo. Muiyiishi mukese kampanda mmulwe kùndi makeelela awu, ngwa mu dimwe dya ku mangumba a matàmbe bunene àdiku mu ditunga emu



leelu ewu, pa kuumusha Katolike. Kwambaye ne: “Mwaneetu Branham, mbintonde be ne mèmè mwine ngäcyòku.” Yèyè ne: “Nebätwänzèjè twètù bõnsò bayiishi bwa kuvwala mizàbì ne kukudimuna nkoolò, ne—ne kuyiisha bintu kampanda. Ne nebätwàmbilè ne yiishàayi pa cikampanda, ku ngondo yisatu yõnsò.” Yèyè ne: “Mèmè ncicyenà mwa kubitwala kabidi to.” Yèyè ne: “Cìndi ne cya kwenza ncinyi? Ndi ne cya kubanga kuyiisha Evanjeeliyo anyi?”

<sup>139</sup> Mèmè kwamba ne: “Mwaneetu, bwa paucìdì anu wa mu dingumba adi, cìneemekè. Amba anu cìdì cikèngelà bõbò kwamba aci. Kadi ndà tamakatamaka too ne kùdì mukulu wènù awu anyi kùdì mutàngidi munene wa ditunga, wàmbè ne: ‘Mukalenge, mèmè ndi mulediibwe cyakabidi ku Nyuma wa Nzambi. Dìyì dya Nzambi ndyòdì edi. Bu nwènù mwa kundekelakù nyiisha Cyòcì aci, nènshaalè mu ekeleeziya wènù. Nwènù babènge, ndi ngumuka. Nwaluje muntu mukwabo pa kaaba kàànyì.’” Ki mushindu wà kucyènza ngwòwò awu. Kudyànganyi mukana to. Kwenji bilumbu to. Pàtukilà patooke wàmbè bwalu anu pa bwalu. Cya bushuwa.

<sup>140</sup> Yèyè ne: “Mwaneetu Branham, udi wela meeji ne ndi mufwànyine kupeta disangisha anyi?”

<sup>141</sup> Mèmè ne: “Mwaba wùdì Mubidi awu, ki wàdisangishilà Mikanku.” Ncya bushuwa, neyilondè.

<sup>142</sup> Byenzè bu muntu, musangu kampanda, uvwa utooyisha tuzoolo awu. Mpindyewu, kì mbilele ngeela to. Ncyèna ncyàmba ne meeji a kwela bilele to. Ndi muswe kucyamba bwa kutòokeshakù kaabwalu kampanda. Úvwa muswe kutèkà cikuka cyèndè pa mayi, kadi kàvwa ne mayi búngì bukùmbàne to. Kutèkayè diyi dya dibata mwinshi mwa cikuka cya nzoolo. Nenku pààkatooyikà mayi ònsò awu, kaadibata aku kàvwa cintu cya citàmbe kwikala cya mmwenekelu wa pabwèndè cívwa tuzoolo atu katùyikù twanji kumona to. Nenku cikuka aci cívwa cituuta cyokò-cyokò bwa kubiikila tuzoolo nenku twànà twa nzoolo túvwa túlwa, kadi kaadibata aku kakàvwa kamanyè mwakulu awu to. Kadi, dîngà dituku, cikuka aci kutùlombolaci too ne kumfundu kwa cikumbi aci. Kùvwa kasùlù kumfundu kwa cikumbi aci. Kaadibata aku nkenzè anu kumvwa mupuuya wà màyi awu anyi, kòkò kwasa lubilu e kuya ne mwàkù mwònsò katàngile ku màyi aku. Cikuka aci kwambaci ne, “cyokò, cyokò, cyokò.” Ne kaadibata kakese aku kwambaku ne, “hoo, hoo, hoo.” Kàvwa kàya katàngile ku màyi aku. Bwa cinyi? Kàvwa nkaadibata, ku ngiikàdilù wakù. Pàkumvwàku mupuuya wà màyi, mwaneetu, kakàvwakù mwa kushààla kule naawu to, bwalu kàvwa kaadibata.

<sup>143</sup> Nenku ndi ngamba leelu ewu ne, bantu kanà bõnsò bàdì bulelela baswe bwa kupeta Nzambi, kabàakulekelakù ekeleeziya nansha yèyè wa bishi ùbàtumina dìyì bwa kwenzabo bintu

bidìbo kabàyi mwa kwenza mu nsòmbelu wabò, *cikampanda* anyi *cikansanga* nansha. Wèwè ne ngiikàdìlù wa Nzambi munda mwebe, neuye ku cijila. Neuye ku cintu cijaalàme. Neutwe cintu cijaalàme nyama ku mikolo. Newènzè cintu cijaalàme. Newèlè meeji ku cintu cijaalàme. Newikalè ne nsòmbelu wa cintu cijaalàme. Wèwè mwikàle dibata, udi unanga màyi. Wèwè mwikàle mwena Kilisto, udi unanga Kilisto. Wèwè mwikàle démon, udi unanga bintu bya dyabulu. Wèwè mwikàle kabangu-nyuunyi, udi udyà bintu bifwè. Wèwè mwikàle ngulube, neudye tùmvi twa nyama. Wèwè udi penyì leelu? Cya bushuwa. Udi ulàka mukana wamba mùdi kuulu eku, munkaci mwa kudya bintu bya Mukalenge, pashiishe upweka panshi kadi kwenda kukalakasa pamwe ne dyabulu. Kùdi cintu cipampàlàmuke mu cyòci aci. Lekela kwikala utèèleja nyuma ayi; ndémóns. Nansha byòbì bikèngela bwa wèwè kushààla nkààyeebè. Balume ne bakaji bàkaadiku bayè kumpala bakafikè ku cintu kampanda, pamwe ne bònso, bàvwa mbalume ne bakaji bàvwà bashààle nkààyaabò ne Nzambi.

<sup>144</sup> Tàngilàayi Miikà, mwàkiimanàye mwaba awu; kaciyi bu lubwebwe lwà Gibraltar to, kadi Lubwebwe lwà Bikondo. Kwambaye ne: “Mémè ncyàkwambakù cintu nansha cimwe to. . . Cìdi seminere wàmba nansha ciikàle cinyi. Cìdi disangisha dyànyi dyàmba nansha ciikàle cinyi. Cìdi mfumu wàmba nansha ciikàle cinyi. Bòbò bankòse mutu, mémè nèngàmbè anu cìdi Nzambi utèèka mukana mwànyi bwa kwamba aci.” Yèyè ùvwa mubinge. Yèyè ùvwa mubinge.

<sup>145</sup> Kadi leelu, balume ne bakaji, kanùtèyikù ntema ku cìdi bàà pa buloba biikàle naaci bwenu nwènu aci to, londàpù lùdìbo naalu, mushindu wà cisàlù cya twìshì cìdìbo naaci, ne bàmba ne: “Wèwè mukashààle wa mu ekeleeziya, newikalè bìmpè.” Aci’s neisàlù cya mafi. Bwa cinyi? Wèwè uci di anu ne dĩaamà dya mpekaatu. Ncya bushuwa. Kadi nyawu nkwambila cintu cimwe, mwaneetu, cìikalà mwa kukukuba ku mpekaatu, ncya ne, lwà ku Mashi a mushinga mukole a Mukalenge Yesu Kilisto ne ùjijibwè tente ne Nyuma Mwìmpè, nenku aci necikukube ku mpekaatu yònsò, ne majinga ebe neikalè matàngija mu Dyulu, nenku kwàkwikalakù ne díbà bwa maalu a pa buloba to.

Tùsambilàayi.

<sup>146</sup> Taatù wetù wa mu Dyulu, patùdi tumona nyuma miseeswishi eyi pa bantu, ne bamanyè ne yòyi yidì yipeetula maalu a Nzambi, ndi ndomba, Nzambi, bwa Wèwè kukwata mulume ne mukaji yònsò mwab’ewu leelu ewu. Enzaku, Mukalenge, ne edi diikalè dituku dyàfikàbo ku dimanya ne nsòmbelu wabò kèna ùpetangana mu byònsò ne Diyì to. Ne bòbò bàtu batèèlèjètèèlèje cintu cya mafi, cìdi dyabulu ùbàtuuyisha naaci cilunji ne bikandakanda bya Bwalu-bulonda Bulelela bwa kale, bintu bibole bya kale bya budingidingi bya pa buloba, ne sèndemà ya kale ne télévisión ya bukooya. Eyi Nzambi, bintu

bìdì kabìyìkù mwa kwenzeka bwa mwena Kilisto kwikalaye ùbìbandila to! Nzambi, abì's bìdì bìtwèndesha ku mwoyi. Wèwè udi mwambe mùdibi bìKwendèshe ku mwoyi, mufwànyìne kulùka. Wèwè udi mwambe ne: “Mbwa ùdi ùya ku bilushi byèndè, ne—ne ngulube ùdi ùya ku bitoci byèndè.” Mbwa wa kale neàlukè cintu kampana. Pa kumona muntu mukulumpe mupete dileediibwa dya citùpà, pààbì yèyè ùvwa ne cya kwikala mulediibwe's, kadi mwena lubombo wa ùlwa ku cyoshelu, ne byenzè anu bu mùdì mwa kuya bwa kulùka maalù a pa buloba's; kadi mwikàle anu mutungunuke, wàlukila buludi ne ùdya cyakabidi cyòci cintu aci. Éyì Nzambi, kezùlàku Nzubu Webè's, Mukalenge. Aleluuyah! Tùmakù Nyuma Mwìmpè ne ditwishisha dya mushindu wà cyena-kale dyàsukulà majinga a muntu ne kusukulakù musuuka wèndè, ne kumusukula yèyè yònsò ne kumuvwija cifùkiibwa cidì mu njila citàngile mu Dyulu. Mupèèshèku. . . Vwìjùlùlàku bunsongà bwèndè bupyabupya ne micìpù yènde bu mùdì nyuunyi wa mukanku, bwa wàmònakù mwa kubànda muulu ne kutàmba bintu bya pa buloba ebu, ne kutumbuka kubwela mu Maulu mwàmwa mùdiye mwa kumona ntatu pacidiyi yilwa kule apu. Enzaku nanku, Mukalenge.

<sup>147</sup> Wèwè utu mufwanyikije baprofeta Beebe naayi, ne mikanku, bwa ne bôbò bàvwà ne dísù dya mukanku, bàvwa mwa kuya muulu menemene ne kumona maalù ntanta mule kumpala kwa kulwawu. Éyì Nzambi, beneshaku kaekleeziya kakese aka. Beneshaku bantu bàdì bàlwa kaaba aka aba. Beneshaku beenyi bàdì munkaci mwetu leelu ewu aba. Ne bàmanyèku ne Diyìisha edi kadìvwa diludikila muntu kampana musungùlùke to, kadi divwa diludikila, Mukalenge, nangàngà aba bàdì mu lukengelù lwà menemene abu; bamanyè ne dìngà dituku netwikalè ne cya kwimana pamwe ku cilumbulwidi cya Nzambi, kabidi bamanyè ne netwikalè ne cya kufila dyandamuna bwa kwikala bamanye cidì Bulelela kadi kupanga kuBwamba. Taatù, ndi ndomba bwa Bwàngaciibwèku mu mwoyi ne mwoyi wònsò. Mu Dìnà dya Yesu.

<sup>148</sup> Ne mitu yetu miinyika anu bwa katanci kakese cyanààna, ndi ndikonka ní kùdikù muntu kampana kaaba aka mu dinda emu udi mufwànyìne kwambakù ne: “Mwaneetu Branham, tuubintu tukese twa kale etu ntungendeshe ku mwoyi ne tuncyokeshe. Ndi ne tuntu tukese menemene tùdì kacya twàndamata kùkaadi ntanta mule. Ndi—ndi misangu yònsò anu ngaakula dìbà didì kadìyi kwakula to. Ndi—ndi ngenza bintu bìvwà kabiyi bìkèngela mèmè kwenza to, ne ndi mucìmanyè. Kì mbikùmbànyìne mwena Kilisto to. Ncyèna muswe kwenza nanku to; Nzambi mmumanye ne ncyèna muswe nanku to. Ne ncyèna muswe kabidi kuteeleja nyuma wa kale awu to. Ncintu citù cinshiyishe paanyima mu nsòmbelu wanyì mujimà, cimpangishe mwa kwikala ne dinanga dilelela ne budishikaminyi mu Kilisto. Ndi muswe bwa ùnsambidilèku,

Mwaneetu Branham, bwa cìn—cìnguumùkèku leelu ewu.” Udikù mwa kwela cyanza cyebe muulu anyi? Mitu yònsò yikàlè miinyika. Nzambi anubeneshe. Kaa, ekelekele, byanza makumi! Tuntu twa tukese menemene twa kale, tuntu tukese twa kale tùdì tükufikishà ku dyakula anyi kubanga tuumakokyanganyi twa mushindu kampanda mu ekeleeziya, tükufikisha ku dyangata luseke lwà cintu kampanda cya mushindu awu. Kaa, aci's ndipanga dya kaneemu ku maalu a Nzambi. Aci's ndipanga kupetangana munkaci mwa bânà bàà muntu. Nenu kwenji abi to. Kwêna muswe nanku to. Kwêna muswe abi ne tuntu twa tukese twa kale atu to, tuubijji twa kale atu ne bikwabo byònsò, bwa kukushiyishatù paanyima.

<sup>149</sup> Amba ne: “Nzambi, ncyêna muswe kabidi cintu aci to. Nkààdi mumvwe cingendesha ku mwoyi ne cincyòkèshe. Ndi leelu ewu mudilongolole bwa kucibenga. Nyewu ndwa mpindyewu, Mukalenge, ne ndi muswe kushiyangana ne citù cyànyì cyònsò aci. Mwaneetu yèyè kàyi ùsòmba naanyi bilenga to, mêmè nêmmusambidilè nansha bishi. Papa wànyì yèyè kàyi ùsòmba naanyi bilenga to, mêmè nêmmunangè nansha bishi. Mukàjàànyì yèyè kàyi ùsòmba naanyi bilenga to, anyi bàyaanyì, mêmè nênye, mudipwekeshe, kumpala kwa Nzambi. Mukalenge, ndi nteeka mèsù àànyì anu ku Bukalenge Bwebe. Ndi muswe bwa meeji ànyì ikalè malulame. Ndi muswe bwa mwoyi wànyì wikalè mùle tente ne disanka. Ndi muswe kutungunuka, pàdi lutatu lùvuma mu nyungulukilu wanyì apu, ndi muswe anu kushààla ne byanza byànyì byela muulu ne mwoyi wànyì mutooke kumpala Kwebe, Mukalenge, mumanyè ne, dīngà dituku nêntwilanganè Neebe. Ndi muswe dilabula dya mushindu awu adi. Mukalenge, ungenzèku nanku, kubangila ku leelu.”

<sup>150</sup> Swaku wèlè cyanza muulu, muntu uvwa kàyi mwele cyanza muulu kùkaadi katanci awu. Nzambi akubeneshe. Nzambi akubeneshe. Mwaneetu wa bakaji, anji tùpèèshèku cyona patùdì ne mitu yetu miinyika apa. Udi ucyàmba wambilamu mu mushindu kaayi? Bwa mpindyewu kùnàyikù to. Edi kī ndībà dya kunaya to. Edi dībà ndya dyakidila. Ki dībà dyùdì ne cya kuCipeta ndyòdì edi. Lwàku, bilekèlèlè mpindyewu mene. Udi muswe kwenza nanku anyi? Lwàku, fila byònsò byùdì naabi kùdì Nzambi. Amba ne: “Nzambi, ncyêna naabi byàbùngì menemene to. Mêmè ndi anu mukaji mukese wa nzubu. Ncyêna mwa kwenza byàbùngì menemene to, Mukalenge, kadi ndikù—ndikù mwa kubala Bible Webè, ndi mwa kusambila dituku dyònsò. Ndi mwa kwimansha bucyafu bwònsò bùdì mu meeji àànyì. Ndi mwa kwimansha bintàkanyì byònsò abi. Ndi mupiile ku bintu byàbùngì bidì muyiishi wàwa mwambe mu dinda edi abi, pa nanku ndi—ndi mbilekelela leelu ewu. Ncyêna mubiswe to. Nzambi, nguujeku ne dinanga. Nguujeku ne cintu cidì cimfikisha ku dinanga mwena lukuna wànyì wa menemene ùndì nende awu. Ncyà bushuwa ne ki cìndì muswe, Mukalenge.”

<sup>151</sup> Pàcìdiye wimba cisanji kaaba aka apa, swaku ulwe mpindyewu wimanè ku cyoshelu eku bwa katanci kakese cyanàànà, patùdi tudisangakù ku mwaku wà disambila apa. Wèwè ucyàmba ucyàmbilamù cya bushuwa mpindyewu, wèwè mudilongolole cya bushuwa bwa kubilekela, kwàkuumukakù ku cyoshelu eku leelu ewu mwikàle ne cyòci aci pa mwoyi wèbè to, wèwè mulwe ne meeji matooke. Nenku amba ne: “Ndi nseemena kaaba aka anu bwa kwimana cyanàànà, anu bwa katanci kakese, Mwaneetu Branham, eyowa, paùdi wamba mwaku wà disambila pamwe naanyi apu, mèmè mwine.” Ndi—ndi muswe bwa ùlwe, ùsambilè. Udikù mwa kulwa mpindyewu anyi? Ne mitu yenu miinyika, mbanganyi bàdiku baswe kujuuka ne kulwa ku cyoshelu, kwimana banyungùlùkile cyoshelu?

Kùmpìcìkù to, Éyì Musungidi mupole,  
Umwàku lubila lwànyì lwà didipwekesha  
naalu;  
Pa Ûcìdi ubiikila bakwabo apa,  
Kaa, kùmpìcìkù to.

Musungidi, Musungidi,  
Umwàku lubila lwànyì lwà didipwekesha  
naalu;  
Pa Ûcìdi ubiikila bakwabo apa,  
Kaa, kùmpìcìkù to.

<sup>152</sup> Nansha byòbi ne wèwè ukààdi mwena Kilisto wa kùkaadi ntanta bule kaayi, kadi mucìkàle anu ne tuunyuma twa tukesetukese twa kale tùdi twàkula neebe atu, tükwenzeja bwa wikalè uzèleka, tükwenzeja bwa wikalè wakula bwa muntu kampanda. Pàdi muntu ùlwa ne ùbanga kwakula bwa muntu kampanda mukwabo, wèwè udiswika nende buludi ne, kaa, numujaana. Aci's ncibi, mwaneetu. Kwènjikù nanku to. Aci ndekeelu wa byònsò's necìkupangishè bwa kubwela mu Buloba bulaya. Paùdi anu ne tuntu tukese twa kale tùvwà katùyì tükèngela kwikala naatu atu, dinanga dya Nzambi dyòdi kadiyi bulelela mu mwoyi wèbè to, kwènàku muswe bwa kwikala inàbànzà ne mulume mulelela, ùbandè kuneeku wàmbe ne: “Nzambi, anu mwab'ewu mene ndi muswe kubilekelela, mu dinda emu, mwab'ewu mene. Ndi muswe kuumuka ku cyoshelu eku mwikàle muntu mushiilàngàne.” Udikù muswe bwa kulwa anyi?

<sup>153</sup> Kùdiku ngènzàmpekààtu utu kàyì mwanjì kwitaba Yesu, pèèbè mumanye ne udi ngènzàmpekààtu, kùyì muMumanye bu Musungidi webè anyi? Udi wamba ne: “Mwaneetu Branham, eyowa, mvwa ndyàmbidila múmvwà ne mulòwù wàbúngì. Ntu nya ku myaba ya maja ne maafètes ne bintu byònsò abi. Ntu mbandila sèndemà ya mishindu mibì. Ne ntu—ntu mbala mikanda ya maalu mafunda a mishindu mibì. Ntu mbala mikanda ya kale yìdi ne maalu-malonda a ciipanshi. Ntu mu mushindu kampanda nsankila diyibala.” Mwaneetu, kùdi cintu

kampanda cipampàlà mùke mu wêwè amu. Ki dyebe dijinga ndyôdi adi; wamonu's, ndeejè wêwè anu bidì muntu ùbala, ndeejè wêwè anu bidìye ùbandila, nteelejè mìjiki yìdìye ùtèeleja.

<sup>154</sup> Dituku adi, ngenda ndwa mu kashinyi, muntu kampanda kwololaye cyanza e kukangulaye cisanji cyànyì, mùjiki kampanda wà maalu a ciipanshì. Mémè kwamba ne: “Kànga cintàkanyì aci. Ncyèna muswe kuteeleja abi to.” Bintàkanyì bya mìjiki kampanda ya kale ya dizùnzuka abi.

Yèyè ne: “Mona's, mémè's ntu muswe kuteeleja bya nanku awu.”

Mémè kwamba ne: “Ngiikàdìlù webè mmubi. Wêwè udi mubi.”

<sup>155</sup> Pàmvwà mwaba ewu, ndambu wa matuku paanyima pàà cyôci aci, ku luseke lwà mukuna anyì ku luseke lwà kakuna kampanda, munkaci mwa kuloba, pamwe ne yèyè muntu awu. Tunyuunyi tukese atu tùvwa twimba. Tunyuunyi twa ntàkàlà tùvwa tùtuuta mikwekwe. Mukalenge kandìndì ùvwa ùbùuka muulu mu mpeepele, anyì kamfiba's wè, kìmba masaamuna. Mémè kwela nsongààlùmè awu lubila, kwamba ne: “Tangila, wêwè mulumyana, ki yànyì mìjiki nyôyi ayi. Shààlà mulame ayi mikàngula. Ki cyànyì cisanji mémè ncyôci aci. Nzambi ngutu uyitùma bwa kwikalayi yìngimbila pàndì kaaba aka. Ki yidì yintuuyishakù mémè cilunji mu musuuka.”

<sup>156</sup> Mmìmpè kutàmba bintàkanyì byònsò bya babùlùke ebi, bisanji bya matùmbà bidì bìkungula, kacya byàtùngunuka ebi, kùdì kùyikù nansha mwa kudya mwaba wà bantu bitwilàngàne to. S'ndiilu wa dyabulu. S'nnzubu wa dyabulu, mmukooyike yònsò ne mpekaatu. Utu mukasopàkàne yònsò mu nsebelà ayi usànkilamù anyi? Pàdìbo bèèla mfranga ayi mu bintàkanyì bya bisanji abi, ne bintu byònsò bya bukooya abi bilwapù, pèèbè usànkila biine abi? Bundu bwebe. Wêwè's udi muntu mutwe cimpingà. Udi kule ne Nzambi. Kwèna mumanye Nzambi to. Bu wêwè mumanye Nzambi, mu difwidiibwa dya luse dya mpekaatu yebe, kùvwakù mufwànyìne kuteeleja bintu bya macimbu bya mushindu awu abi to. Nunku mbifwe bwebe wêwè. Udi—udi mufwànyìne kulùka pa kubyumvwa. Kwèna ubìswakù to. Webè ndiilu mmwìmpè kutàmba abi. Udi unanga Nzambi. Kwènàku mwa kulwa mu dinda emu, kutwa binù pamwe ne bàdì bàjikula cyôci eci mu dinda emu aba anyi?

<sup>157</sup> Ki balume ne bakaji mbòbò aba batwè binù anu mwab'ewu mene, bàdì beena Kilisto kùkaadi bidimu. Mémè ncyèna mbànyènga bwena Kilisto bwabo to. Kadi cìndì nteeta kwenza nkubambila ne dyabulu awu, udi ubiimanyina mu meeji awu, ùdì ùbàpangisha Disanka mu kaabujimà. Nyuma Mwìmpè n'Disanka. Mwaneetu, mémè's ntu mbiika mukwacike, nya kalààla mukwacike, mukwacike dituku dijimà, mukwacike bufuku bujimà. Kaa, ndi anu—ndi anu munange bwa . . . Pàndì

nya ku diloba, ndi anu ne: “Kùmpicikù to, Éyì Musungidi mupole, Umvwàku lubila lwànyì lwà didipwekesha naalu.” Pàndì nya ku dilemba dya nyama, ndi ngenda ngimba masaamuna a Nzambi. Ndi ngenda nyiishangana, ndi. . . kwònsò kùnyaayà aku. Kwènàku muswe kwikala mushindu awu anyì? Mùle tente ne Nyuma Mwimpè, Yèyè’s ùdi ùkusalulakù’s. Kaa, ekelekele! Paùdì umvwa bòbò bimba misambu mikooyike ayi, wèwè udi mwa kwimbakù ewu ewu:

Ndi mu njila mutàngìle ku Buloba bulaya,  
Ndi mu njila mutàngìle ku Buloba bulaya;  
Éyì nganyì udikù muswe kulwa bwa kuya  
naanyì?

Ndi mu njila mutàngìle ku Buloba bulaya.

Ndi mu njila mutàngìle ku Buloba bulaya,  
Ndi mu njila mutàngìle ku Buloba bulaya.  
Éyì nganyì udikù muswe kulwa bwa kuya  
naanyì?

Ndi mu njila mutàngìle ku Buloba bulaya.

Ndìbà kaayì dîngààfikà ku diikisha  
dibènèshìibwe adì,  
Ne kwikalakù mubenshiibwe bwa kashidi’s  
wè!

Ndìbà kaayì’s dîngààmònàku mpala wa Taatù  
wanyì,

Ne kwikishilakù mu cyàdi Cyèndè?

Ndi mu njila mutàngìle ku Buloba bulaya,  
Ndi mu njila mutàngìle ku Buloba bulaya;  
Éyì nganyì udikù muswe kulwa bwa kuya  
naanyì?

Ndi mu njila mutàngìle ku Buloba bulaya.

<sup>158</sup> Kwènàku muswe kulwa, bwa kuya naanyì anyì? Ndi mvuluka patùvwà bantu batwè ku nkama yitaanu biimàne kuntu kwàka pâmvwà munkaci mwa kubatiiza bantu lukama ne makumi abidi, mu cikondo cya bwena eci mu cidimu amu, kwinshi eku ku mwelelu wà musulu, pàakapwekà Mutooto munene wà mu Dinda awu mutwe nsèsà pa musulu awu. Aleluuyah! Dìyì dyàkula dipàtukilaMù, dyàmbe ne: “Dîngà dituku wèwè neutangalaje Evanjeeliyo pa buloba bujimà.” Mmunyì mùvwàku mwànà wa balume mupele wa ku madimi, mukese, mwikàle cinyonga mwa kwenza ciine aci? Ngàsà wa Nzambi! Amen.

<sup>159</sup> Kaa, udikù muswe kulwa bwa kuya nganyì? Kòsolokà, tèeka ku luseke, bujitu bwònsò mpindyewu. Kuteeleji nyuma miseeswishi ayi to. Lwàku, teejeja Dìyì dya Nzambi, EMU MMÙDÌ MUKALENGE WÀMBA! “Bàdì babènèshìibwe ng’aba bàdì ne nzala ne nyoota ya bwakane, bwalu bòbò nebuujiibwe.”

<sup>160</sup> Twinyikààyaaku mitu yetu mpindyewu patùdì tusambila pamwe ne bàdì ku cyoshelu eku aba apa.

Bànà bananga, ndi muswe bwa nwikalè bavuluke ne, mu dinda emu, nudi mwaba awu mbwa kutèèka ku luseke majitu. Nudi mwaba awu mbwa kutèèka ku luseke bujitu ne bujitu bwònsò ne mpekaatu udi unùjìngila anu bipeepele nunku awu. Pòlò mmwambe, mu Ebèlù, nshapita wa 12.

*...bu mùdìbi ne twètù...tudi banyùngulukila kùdì dituutu bunene nunku dya bantemu, tuteekàayi ku luseke bujitu ne bujitu bwònsò, ne mpekaatu...udi utùjìngila bipeepele nunku ewu,...*

*Ne cìngàmà kabidi ki cinyi? Bwalu...dìbà kì ndifwànyine...bwa kulonda bwa Jidèòná, ...bwa Baalàk, Baalàkà, ...bwa Shimìshòòná, ...bwa Yefètè; bwa Davidì ... bwa Samwèlè, ne bwa baprofeta,*

*Bàvwà ku diitabuuja bacìmùne makalenge, bavwijè bwakane, bapetè mulayi, bakànge mukana mwa nyama wa ntambwe,*

*Bajime bukole bwa kapyà, bapàndùke ku lusongo lwà mwele wà mvita, mu butekètè bavwijìbwe bàà makanda, ne balwè bàà ... bàà bukìtù ... mwena lukuna muye bimpàmbàmba ...*

*Ne bakaji bààkapeta bafwè bààbò babìshùbwe ku lufu ...*

*Ne bakwabo bààkapeta dikengeshiibwa, disekiibwa dya lwonji ne mfimbu, ...kabidi, bipite ne biine ebi, nkanu ne dyediibwa dya mu bùlokò;*

*Ne—ne bakwabo bàvwà bapetè mateeta ... disekiibwa ... dyediibwa dya mfimbu ...*

*...bwònsò bwàbò bààkapetela bujaadiki ku diitabuuja, ...*

*Nenku bònsò aba, bamanè kupetela bujaadiki bwìmpè ku diitabuuja, kabààkapeta mulayi to.*

*Bu mùvwà Nzambi mutulongolewele cintu kampanda citàmbe bwìmpè, bwa ne twètù katùyikù to bòbò kì mbafwànyine kwikala bavwijìbwe bapwàngàne to.*

*Ki bwa cinyi bu mùdìbi ne twètù...tudi banyùngulukila kùdì dituutu bunene nunku dya bantemu, tuteekàayi ku luseke bujitu ne bujitu bwònsò, ne mpekaatu...udi utùjìngila bipeepele nunku ewu, bwa twètù kumona mwa kunyeema ne lutuulu lubilu lwà dipiiyangana lùdì lutùtèèkela kumpala kwetu,*

*Batàngile kùdì Yesu mubangi ne mujikiji wa diitabuuja dyetu; uvwa bwa disanka divwà ditèèkùbwe kumpala kwèndè yéyè wàkakànga mwoyi ku nkuruse, kulengulula bundu, ne...wàkasòmba ku dyabalume dya nkwasa wa butumbi wa Nzambi.*



<sup>161</sup> Yesu, mu disambila Dyèndè, wàkamba ne: “Taatu, Ndi ndijidila Mémè mwine.” Yesu wàkalwa mujidiibwe, bwa Ekeleeziya. Yéyè’s ùvw’a kwikala muselangane, kadi Kàakacyènta to. Wàkalwa mujidiibwe. Wàkamba ne: “Bàjidilè, Taatu, ku Bulelela. Díyì Dyebe ki Bulelela.”

<sup>162</sup> Mpindyewu tuteekàayi ku luseke bujitu ne bujitu bwònsò. Wèwè udi ne ciji anyi? Udi ne cintu kampanda paudi apu, cidi cyènta ne wikalè wakula pàvwàbi kabiyi bikèngela bwa wèwè kwakula anyi? Éyi Nzambi! Cìtèèkè mwaba awu mpindyewu. Cìtèèkè mwaba awu, ùtangilè ùmonè mùdi Kapyà kàà ku cyoshelu kàpweka kàcyùmusha. Tàngilà ùmonè mùdi dinanga dya Nzambi dicilàka. Tàngilà ùmonè cìtù cyònsò cya kale aci, mushindu wùtù wakula ne mukajeebe, mushindu wùtù wakula ne bayeebe, mushindu wùtù wakula ne mwena mutumba neebe, mushindu wùtù wakula bwa bantu bàà mu ekeleeziya awu, cìtèèkè pa cyoshelu mu dinda emu, nenku Kapyà kàà Nzambi nekàpwekè ne nekàcyùmushè dyakamwe, ne dinanga dya Nzambi nediteemè pa kaaba kàaci.

<sup>163</sup> Udi ne bubeedi anyi? Bùtèèkè pa cyoshelu, wàmbè ne: “Mukalenge, mbwòbù ebu. Fùkakù munda mwànyi nyuma mukезuke. Fùkakù munda mwànyi bukole bwa dyondopa.” Kadi ùmonè cyènta Nzambi. Nzambi neàcyèntè mu dinda emu.

<sup>164</sup> Taatu wetù wa mu Dyulu, nyewu twinama mu Bwikadi Bwebe, bwa kukwàcishakù bàdi ku cyoshelu aba. Ngàsà Webè ìkalèku pa yònsò wa kùdìbo, Taatu. Mpindyewu pàdìbo... Mukalenge, mémè ncyèna mwa kucyènta bwabo bòbò to. Bidi bikèngela bàcyèntè bòbò biine. Muntu nansha umwe kèna mwa kucyènta bwabo bòbò to. Bidi bikèngela bwa kucyèntabò nkàayaabò. Misuuka yabo yàmbèku munda mwabo bòbò biine amu ne: “Éyi Nzambi, bwa eci ciji, nyewu ncitèeka kaaba aka, Mukalenge. Mémè ncyàkucyambulakù to. Bibandè bipwekè, mémè nèncilekèlè ciye, kubangila ku mpindyewu. Ludimi lwànyi lùtù lwòlù anu lupeepèle bwa kwangata luseke lwà bijaanu búngì cyanààna elu, Mukalenge, nyewu ndutèeka kaaba aka. Ncyàdyàkulwàmbulakù kabidi to kashidi kàanyi. Jidilàku ludimi lwànyi, Mukalenge. Ngùmvwèku Banjelo bàlwa, mwàkumvwà Yeshàayi amu pàakambàye ne: ‘Ndi muntu wa mishiku mibiipe. Dyakabi dyànyi!’” Nenku Mwanjelo kulwaye, kwangataye lukwàtu, kuyaye ku cyoshelu ne kwangataye dikalà dya Kapyà, ne kuditèekayè pa mishiku yèndè ne kumujidilaye. Nzambi, jidilaku mwena kabwabwa yònsò, mu dinda emu, udi wakula bibi ne ùsansa dibènga-kupetangana awu. Enzaku nanku, Mukalenge.

<sup>165</sup> Màsàamà ònsò ìnàmì kaaba aka mu citanda emu awu, bàdi baneka kùdi màsàamà abu, bu mùdìbi ne, òwò awu ndémòns kabidi. Nzambi, mémè bu musadidi Webè, ndi nyitàndisha, mu Dìna dya Yesu. Swaku bwa yipatukè mu mubeedi yònsò. Ne muntu mukooyike yònsò, udi ne meeji makooyike, a ciipanshi,

a dyalakana, balume ne bakaji, bya mwomumwe, Nzambi, byùmùshèku munda mwabo. Bònsò bàdi mwaba ewu aba bàdi bàteeta kulekela mfwanka, ne twala twa mu nsòmbelu ne balunda, ne tuufètes, ne citù; Nzambi, salùlaku mwoyi wàbò ne Nyuma Mwímpè mu mushindu wà ne bintu abi bóbò kabùikadikù kabidi ne dijinga dyabi to. Kabyàkwikalakù ne mwaba to; nudi bùle tente ne Nyuma Mwímpè, kubangila anu apu.

<sup>166</sup> Nzambi, vwijàku kaekelèeziya aka cipuka cìdì cilàkuka kapyà. Kàvwijèku mwaba wà Nyuma Mwímpè, kàvwijèku Kapyà kàdì kalàkuka, bwa bàà pa buloba bààkùdimukakù bwa kumona butumbi bwa Nzambi. Nzambi, twàdijàku ne dyanza dikese dya bantu edi, dya ndambu wa nkama ya bantu eyi kaaba aka mu dinda emu. Enzaku nanku, Mukalenge.

<sup>167</sup> Kezùlaku mwoyi ne mwoyi wònsò, Méthodiste yònsò, Baptiste yònsò, Katolike yònsò, Presbytérien yònsò, mwena Mpenta yònsò. Mukalenge, cyùmùshèku mu m'yoyi yabo, ne bàlwekù Kùdì leelu ewu. Enzaku nanku, Taatù. Ndi mbàlambula Kùdì, ne mbafila Kùdì, mu Dìnà dya Yesu Kilisto, bwa dikezudiibwa dya misuuka yabo ne dyondopiibwa dya mibidi yabo. Amen.

<sup>168</sup> Ndi ndikonka, ku cyoshelu, washìyikù bujitu bwebe anyi? Udikù udyùmvwà bu ne bùdì búsanganyibwakù anyi? Wèwè udyùmvwà ne bùdì búsanganyibwapù, wèwè ki udi mumanye. Wèwè ngudi usambila. Mèmè ngààmanyi kuyiisha. Wèwè udi usambila. Bujitu bwebe bwàshààdipù anyi, mwaneetu wa balume, mwaneetu wa bakaji? Udikù cya bushuwa mwa kubùshiyapù anyi? Wèwè mwa kubùshiyapù, ela cyanza muulu, wàmbè ne: “Eyowa, Nzambi, mpindyewu nyewu mbùshiya apa. Dipangakana dyànyì adi, nèndìshiyè pa cyoshelu apa.” Kadi bìshi wèwè, kundekeelu kwa cyoshelu eku, ku dyabalume dyànyì eku, wèwè inàbànzà? Udikù mwa kubùshiyapù anyi? Udikù mwa kushiya bujitu bwa kale abu bwa kushààlabù mwaba awu anyi? Amba ne: “Eyowa, diitabuuja dyànyì nditàngile kuulu Kùdì, Wèwè Mwànà wa mukooko wa Kalvariyo.” Patùdì tuwimba bònsò pamwe mpindyewu apa.

Diitabuuja dyànyì nditàngile kuulu Kùdì,  
Wèwè Mwànà wa mukooko wa ku Kalvariyo,  
Éyì Musungidi wa kùdì Nzambi;  
Mpindyewu ngumvwilèku pàndì nsambila apa,  
Umùshàku dipiila dyànyì dyònsò,  
Kaa, anyìshàku bwa kuumukila ku leelu ewu  
Mèmè yònsò ngiikalè anu Webè!

<sup>169</sup> Tùjuukilàayi kuulu, ne kaneemu kònsò, bantu bònsò. Mpindyewu tèelejàayi ne ntema, bantu bònsò mpindyewu. Muntu nansha umwe kùumukukù to. Anu... Disangisha kì ndyanjì kujika to. Ndi muswe bwa nwàpetakù ndambu wa bwenzeji bunsantu ebu, ndambu wa cikùmà eci.

Pândi ngendela mu nyongolo wa mîdimà wa  
 njila mibwelakane wa panu ewu apa,  
 Ne ntatu yîpaasalala yînnyûngulukila,  
 Wêwê ikàla Mulombodi wanyî;  
 Tûminàku mîdimà dîyî bwa yândamukê  
 muunya,  
 Kûpulàku binsonji bya tunyinganyinga,  
 Ne anyishaku bwa kuumukila ku leelu ewu  
 Mêmê yônsò ngiikalê anu Webè!

Mpindyewu kûwîmbîdi mwena mutumba neebe to. Bwitàayi  
 kwîsù, nenku tûwîmbàayi bitekete bitekete, patûdi twela byanza  
 byetu muulu kùdi Nzambi apa.

Pândi ngendela mu nyongolo wa mîdimà wa  
 njila mibwelakane wa panu ewu apa,  
 Ne ntatu yîpaasalala yînnyûngulukila,  
 Wêwê ikàla Mulombodi wanyî;  
 Tûminàku mîdimà dîyî bwa yândamukê  
 muunya,  
 Kûpulàku binsonji bya tunyinganyinga,  
 Anyî kundekediku mpambuka  
 Nya ku luseke kule Neebe to.

Ndi ne Taatù dyàmwàmwa,  
 Ndi ne Taatù dyàmwàmwa,  
 Ndi ne Taatù dyàmwàmwa,  
 Dîshiyà dya dyàmwàmwa.

Kaa, dîngà dituku dya dibàlakana nênye  
 kaMumòna,  
 Dîngà dituku dya dibàlakana nênye  
 kaMumòna,  
 Dîngà dituku dya dibàlakana nênye  
 kaMumòna,  
 Dîshiyà dya dyàmwàmwa.

Kaa, diine dituku dya dibàlakana adi's dîdi  
 mwa kwikala mmààlabà,  
 Diine dituku dya dibàlakana adi's dîdi mwa  
 kwikala mmààlabà,  
 Diine dituku dya dibàlakana adi's dîdi mwa  
 kwikala mmààlabà,  
 Dîshiyà dya dyàmwàmwa.

<sup>170</sup> Ndi ndikonka mpindyewu, mbanganyi bàdiku ne taatù mu  
 Buloba bukwabo mwàmwa? Tûmonèbi cyanza cyebe. Mbanganyi  
 bàdiku ne maamù mu Buloba bukwabo mwàmwa? Tûmonèbi  
 cyanza cyebe. Mbanganyi bàdiku ne Musungidi mu Buloba  
 bukwabo mwàmwa? Tûmonèbi cyanza cyebe.

Aci's neciikalè disangila dya disanka!  
 Aci's neciikalè disangila dya disanka!  
 Aci's neciikalè disangila dya disanka!  
 Dîshiyà dya . . .

<sup>171</sup> Ndi muswe bwa nwènzèku cintu kampanda. Mpindyewu pàtùdì twimba cyòcì aci cyakabidi apa, ndi muswe bwa wèwè kulabulakù ku cyanza muntu udi mwimane ku luseke lwebe awu, wamba ne: “Mwaneetu wa balume, mwaneetu wa bakaji, ùnsambidilèku, bwa ngaatwilanganakù neebe mu Buloba bukwabo mwàmwa.” Kucyènji pawikalà kùyi wambilamu to. Mbanganyi bàdiku baswe katwilangana muntu ne mukwèndè? Mbanganyi bàdiku baswe bwa katwilangana ne bantu bònsò bàdi kaaba aka, Mwàmwa? Twètù, cya bushuwa tudi baswe. Mpindyewu tùlabulanganàayi anu ku cyanza cyanàànà muntu ne mukwèndè, twamba ne: “Ndi muswe katwilangana neebe, mwaneetu. Ndi muswe katwilangana neebe dîshiyà dya dyàmwàmwa.” Mpindyewu patùdì twimba eci apa ne: “Ndi ne Musungidi dyàmwàmwa.” Eyo.

Ndi ne Musungidi dyàmwàmwa,  
 Ndi ne Musungidi dyàmwàmwa,  
 Ndi ne Musungidi dyàmwàmwa,  
 Dîshiyà dya dyàmwàmwa.

Kaa, dîngà dituku dya dibàlakana nênye  
 kaMumòna,  
 Dîngà dituku dya dibàlakana nênye  
 kaMumòna,  
 Dîngà dituku dya dibàlakana nênye  
 kaMumòna,  
 Dîshiyà dya dyàmwàmwa.

<sup>172</sup> Aci kaciyena cikwenzakù bîmpè ne bilenga anyi? “Yesu, ndamèku pabwîpì ne nkuruse.”

Yesu, ndamèku pabwîpì ne . . .  
 Pàdi mpokolo wa mushinga mukole,  
 Wa cyanaana bwa bònsò, musulu wa  
 lwondapu,  
 Wùpweka wùfùmina ku mpokol-. . . wa  
 Kalvariyo.

Muntu ne muntu èlè cyanza muulu mpindyewu.

Mu nkuruse, mu nkuruse,  
 Mwikalèku bwànyi butumbi kashidi;  
 Too ne piikalà musuuka wànyi mwambwibwe  
 mwa kupeta  
 Diikisha dyàmwàmwa dya musulu.

Mu nkuruse, mu nkuruse,  
 Mwikalèku bwànyi butumbi kashidi;  
 Too ne paapeta musuuka wanyi mwambwibwe  
 Diikisha dyàmwàmwa dya musulu.

Ndi muMunange, ndi muMunange  
 Bwalu Yèyè wakannanga kumpala  
 Ne wakampetela lupandu  
 Ku Kalvariyo.

Butumbi bwikalè kùdì Nzambi!

<sup>173</sup> Twinyikàayi anu mitu yetu mu cimùmà mpindyewu. Ne mu mushindu wètù twètù biine mulenga awu, tuMusaamunaayi anu ne byanza byela muulu, twamba ne: “Twasakidila, Mukalenge, bwa disungila dya musuuka wanyi. Twasakidila, Mukalenge, bwa dingondopa. Twasakidila, Mukalenge, bwa byònsò by’Udi mwenze, mutwale disungidiibwa dya mu kalolo, mutwale lupandu lwà nciyi mufute mfranga. Twasakidila, Mukalenge.” Nyewu tuKupeesha mulambu wa disakidila ewu. Tudi tuKusaamuna bwalu Udi Mulenga mulayà. Udi Mbata wa mu Cibanda, Mutooto wà mu Dinda, Rose wa Shaalòna, Byònsò-mu-Byònsò. Wèwè udi Taatù, Mwàna, Nyuma Mwimpè; Yèyè Uvwakù, Yèyè Udikù, ne Wálwa Awu; Alpha, Omega munene awu. Wèwè udi Mukemeshanganyi Awu, Mfumu wa Ditalala, Muji ne Mütòlokù wà Davidi. Udi Byònsò! Nenku tudi tuKwela twasakidila, Mukalenge, bwa byònsò biWènji. Tudi tuKwela twasakidila bwa Dîyi Dyebe, bwalu Didi Bukènkè mu kajila keetu. Kaa, tudi tulomba, Mukalenge, bwa Wèwè kutwèndeshilakù mu Bukènkè. Enzaku nanku, Taatù. Mu Dîna dya Yesu Kilisto. Amen.

Eyo. Patùdiku basòmbe bwa katanci kakese apa.  
 “Netwendele mu Bukènkè.”

Netwendele mu Bukènkè, Bukènkè bulenga be,  
 Bùlwa mwaba wùdì mamata a lumuma a luse  
 àbàlakana;  
 Bùkenkeshè mu nyungulukilu wetù mwònsò,  
 muunya ne butuku,  
 Yesu, Bukènkè bwa . . .

<sup>174</sup> Tùyaayaaku, bansantu wa yààyà, tùwimbàayi mpindyewu!

Netwendele mu Bukènkè (bukezùke, cijila),  
 Bukènkè bulenga be,  
 Bùlwa mwaba wùdì mamata a lumuma a luse  
 àbàlakana;  
 Bùkenkeshè mu nyungulukilu wetù mwònsò,  
 muunya ne butuku,  
 Yesu, Bukènkè bwa bàà pa buloba.

Lwâku, jikulà ne Yèyè ki Mfumu webè,  
 Yesu, Bukènkè bwa bàà pa buloba;  
 Dîbà adi ngonga ya mu Dyulu neyidilè,  
 Yesu, Bukènkè bwa bàà pa buloba.

Bantu bònsò!

Netwendele mu Bukênkè (Bukênkè bwa mu  
 kajila kàanyi), Bukênkè bulenga be,  
 Bùlwa mwaba wùdì mamata a lumuma a luse  
 àbàlakana;  
 Bùkenkeshè mu nyungulukilu wetù mwônsò,  
 muunya ne butuku,  
 Yesu, Bukênkè bwa bàà pa buloba.

<sup>175</sup> Kacyena cyènza ne nùdyũmvwèku bìmpè anyi? Mbanganyi  
 bàdi badyũmvwèku bìmpè? Ela anu cyanza cyebe muulu  
 cyanàànà mpindyewu, wamba ne: “Ndi ndyumvwa bìmpè bya  
 dikema.” Nyuma Mwîmpè mmukukezùle wèwè yônsò. Dîbà  
 adi’s tudi (twenza cinyi?) twendela mu Bukênkè. Kùtèèlejìkù nî  
 nganyi. . . Bukênkè ncinyi? “Diyi Dyebe m’Mwëndù.” Pa nanku  
 dîbà adi:

Netwendele mu Bukênkè ebu, Bukênkè  
 bulenga be,  
 Bùdi búlwa mwaba wùdì mamata a lumuma a  
 luse àbàlakana;  
 Bùkenkeshè mu nyungulukilu wetù mwônsò,  
 muunya ne butuku,  
 Yesu, Bukênkè bwa . . .

<sup>176</sup> Mpindyewu, aci kî ncyà cìkèmeshà anyi? Mbimweke anu bu  
 ne katwena mwa kwimanyika to. Nyuma Mwîmpè’s nkacya anu  
 wátùpya mu mikaba’s! Kanwènaayìkù nuumvwa mushindu awu  
 anyi? Byũmvwika anu bu ne. . . ? . . . Mbimweke anu bu ne bìdì  
 anu byènda bipàtuka’s.

Evanjeeliyo ùdi ùzònta mashi,  
 Mashi a bayiidi bààkafwilà Bulelela abu,  
 Evanjeeliyo ewu wa Nyuma Mwîmpè ùdi  
 ùzònta mashi.

Wa kumpala wàkafwilà ndongamu ewu wa  
 Nyuma Mwîmpè,  
 Ùvwa n’Yone Mubatiiji, kadi yèyè wàkafwà bu  
 muntu;  
 Pashiishe kulwakù Mukalenge Yesu,  
 kuMupoopelabo pa nkuruse,  
 Yèyè wàkayiisha ne Nyuma ùvwa mwa  
 kusungila bantu ku mpekaatu.

Kùdi Peetèlò ne Pòlò, ne Yone wa kwa Nzambi  
 awu,  
 Bòbò bààkafila myoyi yabo bwa Evanjeeliyo  
 ewu wàmòna mwa kukenka;  
 Bààkasambakaja mashi àbò, mwàkenzàbo  
 kùdì baprofeta bàà kale,  
 Bwa Dìyì dilelela dya Nzambi dyàmòna mwa  
 kwambiibwa ne meeji matooke.

Pashiishe bààkaasa Stefano mabwe, yéyè  
wàkayiisha ùlwisha mpekaatu,  
Kubàfikishayè munda bikole, mu mushindu  
wà ne bôbò bààkamuzaaza mutu;  
Kadi yéyè wàkafwà mu Nyuma, wàkakùùla  
mwoyi,  
Ne wàkaya kapetangana ne bakwabo abu,  
cilwilu cya bààkafilà myoyi yabo aci.

Mmutungunuke anu ne kuzònta mashi, eyowa,  
Ûdi ùzònta mashi.  
Evanjeeliyo ewu wa Nyuma Mwîmpè ùdi  
ùzònta mashi,  
Mashi a bayiidi bààkafwilà Bulelela abu,  
Evanjeeliyo ewu wa Nyuma Mwîmpè  
mmutungunuke ne kuzònta mashi.

Tèèlejààyi!

Kùdi misuuka mwinshi mwa cyoshelu, yìdi  
yèla lubila ne: “Too ne ku dîbà kaayi?”  
Bwa Mukalenge kunyookaYe aba bàdi benze  
bibì;  
Kadi nekwìkalè bakwabo kabidi bààfilà mashi  
a myoyi yabo  
Bwa Evanjeeliyo ewu wa Nyuma Mwîmpè ne  
nkwaka Wendè mukunze bu mashi awu.

Mmutungunuke anu ne kuzònta mashi,  
aleluuya, Ûdi ùzònta mashi,

Ndi muswe kwikala umwe wa kùdìbo.

Evanjeeliyo wa Nyuma Mwîmpè, Ûdi ùzònta  
mashi,  
Mashi a bayiidi bààkafwilà Bulelela abu,  
Evanjeeliyo ewu wa Nyuma Mwîmpè ùdi  
ùzònta mashi.

<sup>177</sup> Ndi muswe bwa kuya ngumukila anu buludi ku cyambilu.  
Amen. Kaa, bilenga bya kacya! Bàna beetu mbafile mashi  
a myoyi yabo. Nekwìkalè kabidi bakwabo bènza cintu  
cimwecimwe aci. Kanùtàcishikù meeji to. Bwalu’s bùdi bwènda  
bùlwa butàngile ku diteetangana dya makànda anu abidi àdi  
panshi aa. Anyì nenùbwelè anyì nenùpatukè. Bònsò patùdi  
twakulangana apa bàdi munkaci mwa kuswikakana mu  
Nsangilu wa Maekeleeziya, ne ònsò neàbwelèmu. Ònsò àdi  
munkaci mwa kudyungwija mushiki.

Kadi nekwìkalè bakwabo kabidi bààfilà mashi  
a myoyi yabo,  
Bwa Evanjeeliyo ewu wa Nyuma Mwîmpè ne  
nkwaka Wendè mukunze bu mashi awu.

Ùdi ùzònta mashi, eyowa, Ùdi ùzònta. (Kaa,  
 aleluuyah!)  
 Evanjeeliyo ewu wa Nyuma Mwímpè ùdi  
 ùzònta mashi,  
 Mashi a bayiidi bààkafwilà Bulelela abu,  
 Evanjeeliyo ewu wa Nyuma Mwímpè, Ùdi  
 ùzònta mashi.

178 Ekelekele! Ndi ngumvwa anu bu ne Dyambwibwa didi  
 kumutu kwa ekeleeziya's. Kaa, cidi cyènza anu ne ndyũmwè  
 bímpè's! Mpekaatu yònsò yidi mwinshi mwa Mashi. Nwamonu's,  
 Nyuma Mwímpè mmunange Dìyì. Dìyì ki cidi Nyuma Mwímpè  
 ùdya, nudi numona's. Kaa, ekelekele! Yèyè ùdi ùpweka  
 ne ùbwela munkaci mwa bantu, ùbàkezula ku mpekaatu  
 yabo, ùmusha mabeedi abo, ùmusha ngiikàdìlù yabo ya  
 buukabungàme ayi. Patùdi twakulangana apa mèmè's nkàadi  
 mukwacike, mukwacike ne mwànyì mwònsò, mukwacike  
 Nyuma, dinanga diikàle difùkuka mu mwoyi wànyì. Cikaadiku  
 ní nganyì ní nganyì mwenze nansha ciikàle cinyì, ncifwidìbwe  
 luse. Mwena lukuna webè wa menemene awu, byònsò byàjiki.  
 Muntu kanà yònsò ukàadikù mwakule anyì mwambe ní ncinyì  
 ní ncinyì awu, bu mèmè mwa . . . ee, ndi . . . cikaadi cimanè kuya  
 cyònsò aci, byònsò mbikezula patùdi twakulangana apa.

Ne Ùdi ùzònta mashi, eyowa, Ùdi ùzònta  
 mashi,  
 Evanjeeliyo wa Nyuma Mwímpè ùdi ùzònta  
 mashi,  
 Mashi a bayiidi bààkafwilà Bulelela abu,  
 Evanjeeliyo ewu wa Nyuma Mwímpè . . .

Kaa, ekelekele! Bilenga bya kacya!

Cikondo cilenga be bwebe wèwè,  
 Cikondo cilenga be bwànyì mèmè;  
 Pìikalàbi ne twètù bònsò tudi tudilongolola  
 bwa kutwilangana ne Yesu Mfumu wetù,  
 Cikondo cilenga kaayi cìikalàku's wè.

Cikondo cilenga be bwebe wèwè,  
 Cikondo cilenga be bwànyì mèmè;  
 Pìikalàbi ne twètù bònsò tudi tudilongolola  
 bwa kutwilangana ne Yesu Mfumu wetù,  
 Cikondo cilenga kaayi cìikalàku's wè.

Nudi banangè aci anyì? Bantu bònsò, tuyaayaaku!

Kaa, cikondo cilenga be bwebe wèwè,  
 Cikondo cilenga be bwànyì mèmè;  
 Pìikalàbi ne twètù bònsò tudi tudilongolola  
 bwa kutwilangana ne Yesu Mfumu wetù,  
 Cikondo cilenga kaayi cìikalàku's wè.



179 Ndi ndyumvwa anu bu ne ditabuluja dya cyena-kale didi mu ekeleeziya's. Kanwènaayikù nuumvwa peenu nanku anyi? Anu disukudiibwa dya kale adi, dikezudiibwa; cikondo cîmpè, ne cilenga cya kale. Kanwènaayikù nudyumvwa bîmpè anyi? Kaa!

NémMutùmbishè, némMutùmbishè,  
Tùmbishàayi Mwânà wa mukooko mushipa  
bwa bangènzàmpèkààtù.

Tùwímjààyaaku mpindyewu, bantu bônso. Nudi bawùmanyè anyi? Mémè ndi muwùmanyè. Vwilàaku apa; ngambùlwishèku bwa kuwùtùma, Mwaneetu Neville. Ne nwènù bônso, cyapamwe mpindyewu, twèlàayi anu byanza muulu, tùwímjààyi nanku, mpindyewu, mpindyewu, panwikalà ne mushindu.

Tùmbishàayi Mwânà wa mukooko mushipa  
bwa bangènzàmpèkààtù;  
Mupèèshaayi butumbi, nwènù bantu bônso,  
Bwalu Mashi Èndè mmasukùle dikeji dyônso.

180 Mpindyewu, banto bônso, tùyaayayaaku!

NémMutùmbishè, némMutùmbishè,  
Tùmbishàayi Mwânà wa mukooko mushipa  
bwa bangènzàmpèkààtù.  
Mupèèshaayi butumbi, nwènù bantu bônso,  
Bwalu Mashi Èndè mmasukùle dikeji dyônso.

Amen. Abi kî mbilenga bilayà anyi?

Cimenga citooke cya masàngà,  
Ndi ne nzubu mwalabale, lonzènè, ne cifulu  
cya butumbi;  
Mpindyewu ndi mwindile, ntangila ne  
nsambila,  
Bwa Cimenga citooke cyàkamònà Yone  
cipweka aci.

181 Amen. Bilenga be! Kaa! Mpindyewu tùjuukilàyaaku kuulu, bantu bônso. Ndi ntekemena ne nudi badyümvwè bîmpè. Nwavulukaayi masangisha a diloolo edi. Mpindyewu tudi baswe kwimba musambu wètù mulenga wà kale, wà ditangalajangana naawu awu.

Twinamina Dînà dya Yesu,  
Tuona mikookwela ku makàsà Èndè,  
Mfumu wa bamfumu mu Dyulu netuMwase  
cifulu cya butumbi,  
Pààjikà lwendu lwetu.

Eyo. Bantu bônso mpindyewu, cyapamwe. Eyo.


Twinamina Dîna dya Yesu,  
 Tupona mikookwela ku makàsà Èndè,  
 Mfumu wa bamfumu mu Dyulu netuMwase  
 cifulu cya butumbi,  
 Pààjikà lwendu lwetu.

Dîna dya mushinga mukole (Dîna dya  
 mushinga mukole), Éyì dya bupole be! (Éyì  
 dya bupole be!)

Ditekemena dya buloba ne disanka dya Dyulu;  
 Dîna dya mushinga mukole (Dîna dya  
 mushinga mukole), Éyì dya bupole be! (Éyì  
 dya bupole be!)

Ditekemena dya buloba ne disanka dya Dyulu.

<sup>182</sup> Dinda dilenga kaayipu's wè! Cikondo cilenga kaayipu's wè!  
 Twinyikààyaaku mitu yetu mpindyewu bwa katanci kakese  
 cyanàànà. Muntu yònsò àtangilè buludi kùdi Kilisto mpindyewu,  
 Musungidi webè awu. Mu cimùmà, ndi muswe bwa ùMwelè  
 twasakidila ne nùMupè butumbi. Amba ne: "Mukalenge, ndi  
 nKwela twasakidila wabûngi bwa dijidila dya musuuka wànyì.  
 Ndi nKwela twasakidila wabûngi bwa byònsò biWàngenzèdi.  
 Nyuma Webè ikalèku pambidi pàànyì dituku dijimà edi,  
 Mukalenge. Ndombòlèku. Ndudikèku. Mbènèshèku." Nzambi  
 ànùpèèshèku dibenesha adi, ki disambila dyànyì.

Mpindyewu patùcìdì biinyiike mitu yetu apa, Mwaneetu  
 Neville, wèwè ùtùtangàlàjèku ne mwaku wà disambila. 

*NYUMÀ MISEESWISHI* LUA55-0724  
(Enticing Spirits)

DILONDANGANA DYÀ DILONGA DYÀ MAALU À BAADÉMONS

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyalumingu mu dinda, mu matu 24 a ngondo wa mwandamutekete, cidimu cya 1955, mu Branham Tabernacle mu Jeffersonville, Indiana, U.S.A. Ndyumusha pa mukaba wa mêyi ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2021 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)